

# MPEVE YA KIELEKA



. . . kwikila.

Beto bikala ya kutelama kaka mwa ntangu fioti na yina beto ke sambila. Beto kulumusa bayintu ya beto.

<sup>2</sup> Tata ya beto ya Mazulu ya kusungama, mutindu beto ke belama na Nge ntangu yayi na Nkumbu ya yina me lunga na nionso ya Mfumu Yesu, beto zola pesa Nge lukumu samu na yina Nge me sala samu na beto, meso ya beto me mona, mpe makutu ya beto me kuwa na bilumbu yayi ya nsuka ya mambu ya nsuka ya disolo ya yinza yayi, na yina ntangu ke zimbana na kati ya Seko, mpe beto ke mona Bansemo ke sema, beto zaba ti ya ke ntama mingi ve na Nkwizulu ya Mfumu Yesu.

<sup>3</sup> Beto ke lomba na Nge, Tata ya Mazulu, na kubambuka moyo na beto na nkokila yayi. Mpe kana ya kele na mpeve ya yimbi na kati ya beto, basisa yawu, Mfumu, na nkokila yayi, ti beto lenda vwanda ya kusakumuna na Nge kana Nge lendaka kwiza na nkokila yayi. Beto ke sambila samu na bambevo mpe bantu yina kele na nsatu.

<sup>4</sup> Beto ke sambila samu na Dibuundu ya Nge, yina kele awa mpe bisika nionso, na yinza ya muvimba, bana ya Nge bisika nionso na yinsi nionso, ti beto lenda sukula ba-robe ya beto na Menga ya Mwana-dimeme, mpe kuwa lubokilu yina, “Beno tala, Bakala ya makwela ke na kwisa. Beno kwenda kutana na Yandi.” Ti beto lenda vwanda na lenda na ntangu yina, Mfumu, na nzila ya lemvo ya Nzambi, mpe na nzila ya mangolo ya Yesu Yina beto ke na kivuvu, samu na kukeba minda ya beto mpe kukwenda na ntwala samu na kukutana na Bakala ya makwela. Baka Ndinga ya Mfumu na nkokila yayi mpe sala nzengolo ya bantima ya beto. Katula kukondwa lukwikilu nionso. Pesa beto kusalu ya nene. Na Nkumbu ya Yesu beto me lomba yawu. Amen.

Beno lenda vwanda.

<sup>5</sup> Ya kieleka ya ke vwanda mbote na kuvutuka awa na . . . kivinga yayi ya Mfumu, na nkokila yayi, na kati ya kusalu. Beto vwandaka kaka na ntangu ya kitoko mingi mazono na nkokila kuna na . . . Mpangi Groomer. Mpe mu ke bambuka moyo na mvula me luta beto kuzwaka ntangu mosi ya nkembo.

<sup>6</sup> Beto me kuzwa ntangu ya nene, bisika nionso. Mfumu me sakumuna beto mingi ya kulutila mingi, na yina mu banzaka ti Yandi ke sala. Kasi Yandi me fuluka na mawa mpe lutondo. Ya ke kaka mbote na kuzaba Yandi. Mutindu yina ve? Mpe kubanza “Kuzaba Yandi, kele Luzingu.” Kuzaba Yandi, kele Luzingu.

<sup>7</sup> Ntangu yayi, mbasi na nkokila, beto ke vwanda na Central Avenue Assembly, mu banza mutindu ba ke bokilaka yawu.

Mpangi Fuller, mpangi-bakala ya mbote. Mpe mu banza ti yawu kele yinzo-Nzambi mosi ya nene kuna. Mpe beto ke banza mbala yankaka ti beto lenda vwanda na ndonga ya bisambu, kana yawu kele mbote mingi na Mpangi Fuller. Na yina beto. . .

<sup>8</sup> Mpe na yina, na suka yina ke kwisa, beto fwana vwanda, mu banza, yina ba me bokila Dibuundu ya Bantumwa awa na Phoenix. Mpe mu ke bambuka moyo ve nani pasteur, mpangi-bakala yina, vwandaka. Mu vwandaka kuna mvula me luta? [Mpangi-bakala mosi me tuba, “Ve. Ya kele dibuundu ya malu-malu, ya Mexique, Mpangi Branham.”—Mu.]

<sup>9</sup> Mpe na yina Lumingo na nkokila beto ke vwanda kuna na dibuundu ya Mpangi ya beto ya ntalu Outlaw, Dibuundu ya Nkumbu ya Yesu. Mpe mu ke na kivuvu ya nene, mpe dibuta ya munu, samu na kukwenda kuna mpe kuwa mwa mikunga yina ya mbote.

<sup>10</sup> Billy Paul lendaka zaba yawu, konso kitini, na ntima. Beto bulaka nkunga yina, *Mu Ke Mata Na Zulu, Na Zulu*, na yina, ya kieleka, kima yango me beba, na bande. Yandi ke banda kuna na bureau, mpe ntangu nionso ya kilumbu ntangu mu ke kwendaka kuna, diambu ve, yandi ke bula yawu, “Na zulu, na zulu, na zulu.” Ya kele kima mosi! Beto bulaka yawu kuna, mpe diske me beba kaka.

<sup>11</sup> Beno zaba, mu me kuzwa mutindu ya nsatu mosi na nkokila yayi, ti, mu kele fioti na ndinga ya kukangama. Mu banzaka, “Oh, kana mu lendaka mona muntu mosi, yina ke tuba samu na munu,” mpe yawu salamaka kuna samu na kutala Jack Moore. Ya kieleka kaka. Munu ata mbala mosi ve. . . Oh, mu banza ti yina ke vwanda kaka mbote mingi, Mpangi Jack. [Milabu ya Mpangi Jack Moore—Mu.] Ntangu yayi beno kuwa yawu.

<sup>12</sup> Mpe mu banza ti mu ke mona Mpangi Roy Borders yina me vwanda kuna, diaka. Yinga, tata. Mpangi Noel Jones kele ya kuvwanda awa. Oh, la la! Beto kele kaka pene-pene, bisika nyonso. Mu banza ti ya ke vwanda ntangu mosi ya mbote, mu banza, kana mu lenda pema fioti, beno zaba, mpe kuzwa mwa babakala yayi ya mbote samu na kutelama awa mpe kutuba samu na munu ntangu ndinga ya munu me kangama, beno zaba. Mpangi Jack me tuba, “Mfumu kele ve na luzayikisu yina.” Mbote, mu vwandaka ya kulemba ntangu mu kwisaka. Mpe mu—mpe mu vwandaka fioti ya kulemba, ntangu nionso.

<sup>13</sup> Mpe mu ke mona bantu me telama kuna, mpe wapi mutindu ba fwana kutelama, mpe mu ke na kyese ti mu kele ya kutelama na bawu. Ntangu yayi, Mfumu kusakumuna beno.

<sup>14</sup> Mpe beto ke na kuingila ntangu yayi na balukutakanu yankaka yina ke na kwisa. Na yina na sabala yina ke kwisa ya me tala ba-Assemblée ya ba-Pentecotiste, mpe nionso yina. Mpe beto ke vwanda kuna, na Kilumbu ya tatu na nkokila, na kilumbu ya 11 mpe na sika ya Garfield. Mu lendaka ve kaka

kubambuka moyo na bawu nionso na mabanza. Na, mu banza, Assemblée ya Ntete ya Nzambi na kati ya mbanza. Mpe—mpe kuna lukutakanu ke banda na Ramada.

<sup>15</sup> Mpe ntangu yayi ya kele na nkinzi ya Bantu ya Mumbongo kuna na mbanza ya ngudi ya Arizona: Tucson.

<sup>16</sup> Mpe ya kieleka, beto nionso zaba ti Phoenix mpe bisika yayi, kele kaka na nziunga ya mbanza yina. Mpe ya kieleka. Yina kele kisika ya ngudi. Yina kele mbanza ya munu ya lubutuku, beno zaba, na yina, mpe ya kele, na zulu ya mongo. Mpe na manima ya yayi, kaka, na kuvwandaka na nziunga ya yawu, na yina, ya kele mbote na kuvwanda na beno nionso mutindu bankalani, na yina . . .

<sup>17</sup> Mu ke kwikila ti ya vwandaka Mpangi Rasmusson, na nokila mosi, yandi tubaka kima mutindu yina na lukutakanu mosi, mpe, oh, la la, ya vwandaka mutindu panzaka lukutakanu. Mu ke kwikila ti beto vwandaka na—beto vwandaka na Houston. Mpe ya vwandaka Ramsar. Ya vwandaka yandi. Yandi tubaka, na nokila yina Wanzio ya Mfumu kulumukaka, bawu kangaka foto, mpe yandi tubaka, “Benoni nionso bantu yina kele pene-pene awa na—na Dallas,” yandi tubaka, “beto zaba ti ya kele na kizunga ya Houston.” Mpe, oh, la la! Texas lendaka ve kukanga ntima na yawu, mutindu beno bantu ya Arizona lendaka sala yawu. Na yina ya vwandaka na pima ya nene kuna na lukutakanu.

<sup>18</sup> Mbote, Yandi kele mbote mingi. Mpe ntangu yayi mu banza ti beto ke baka Masonuku awa, mpe beto ke pesa kaka mwa kimbangi samu na mwa ntangu fyoti. Ya lendaka ve kusoba yawu? Mu me katuka na kubula ngolo mingi ti mu me kuma na nsoni na kutala beno. Mpe mu banza kupesa beno mwa ntangu ya kupema, mpe mu ke pesa kimbangi mosi ya bumbote ya Mfumu ya beto.

<sup>19</sup> Beto tala kisika mosi na Santu Jean, kapu ya 16 ya Santu Jean. Mpe mu ke baka 16:12. Mu ke zola kutanga na—katuka kisika yina na Nsangu ya mbote ya Santu Jean. Mu ke zolaka kutanga Ndinga, samu ti Ndinga kele yina ke salaka beto kuzaba ti ya kele Kieleka. Kubanda na nzila ya 12, mpe beno kuwa mbote ntangu yayi, samu ti mu zola kupesa kimbangi.

<sup>20</sup> Mpe na manima beto ke meka kubanda kaka na mwa ntangu ya mbote. Mu me kanga beno ntangu mingi. Mpe mbasi na nokila, na yina, beto ke vwanda diaka na ndambu ya ngunga ya kulutula. Yina ke sala ti yawu vwanda pene-pene ya ngunga mosi, mutindu yina ve?

Na yina, na yina, yayi ke banda na nzila ya 12:

*Mu ke diaka na mambu mingi ya kuzabisa beno, kasi ntangu yayi beno lenda ve kukanga ntima na kuwa yawu.*

*Na yina ntangu yandi, Mpeve ya kieleka, ke kwisa, yandi ke twadisa beno na kieleka nionso: samu yandi ke tuba ve samu na yandi mosi; kasi nyonso yina yandi ke kuwa, ti yandi ke zonza: mpe yandi ke lakisa beno bima yina ke kwisa.*

*Yandi ke ntangu yayi kembisa munu: samu ti yandi ke yamba beno, mpe ke lakisa yawu na beno.*

*Bima nionso . . . Tata kele na ya munu: na yina me tuba ti munu, yandi ke baka ya munu, mpe ke lakisa yawu na beno.*

<sup>21</sup> Beno zaba, mazono na nkokila, kulutila, beto vwandaka na mwa kifwanukusu ya yawu. Ntangu yayi, beto kele bantu ya Nsangu ya mbote ya Muvimba, na kukwikilaka na bisalu nionso ya Mpeve-Santu. Mpe ntangu yayi, ya kele kaka mutindu mosi beto lendaka vwanza bantu ya Nsangu ya mbote ya Muvimba, kele kukwikila Nsangu ya mbote ya Muvimba, nionso yina Mfumu sonikaka. Mpe mu ke kwikila ti beto kele, beto mosi, kima mosi ve. Beto kele kaka mutindu . . .

<sup>22</sup> Mutindu mu tubaka na Mpangi Carl, mazono, ke tala yinti, mu tubaka, “Yinti yina ya diba kele ve kitoko? Kasi, na manima ya nionso, kima mosi ve kele samu na yawu kasi kinkuku ya mbombi ya volcan. Yawu yina kaka.” Mpe mu tubaka, “Tala mutindu ya kele ya kuswaswana ntangu yayi na yinti yina ya eucalyptus. Mbote, yinki kele yinti ya eucalyptus? Mbombi ya volcan, kele kaka na luzingu na kati ya yawu.” Mpe mu tubaka, “Na manima ya nionso, yinki mu kele mpe yina beno kele? Mbombi ya volcan, yina kele kieleka, kubanda na ntoto; putulu ya ntoto, na luzingu na kati ya yawu.”

<sup>23</sup> kasi konso luzingu me kunama na mfumu ya mupesi-Luzingu, mpe Yandi zaba kaka wapi mutindu mpe yinki kusala. Mpe bima nionso yina Yandi tulaka awa na zulu ya ntoto kele samu na nkembo ya Yandi. Bambwetete kele samu na nkembo ya Yandi. Mipepe kele samu na nkembo ya Yandi. Bafololo kele samu na nkembo ya Yandi. Mpe beto kele yimpu ya kimfumu ya nkembo ya Yandi.

<sup>24</sup> Kasi ya ke monana ti bima nionso ke tumama na Yandi kasi muntu. Muntu ke monana kaka ti . . . Yandi kele na ntangu ya mutindu yina, samu ti yandi vwandaka kima mosi kaka kubwaka. Bima nionso yankaka vwandaka na mutindu ya yawu ya kisina. Kasi, muntu kubwaka. Na yina, Nzambi ke na bitumba na yandi, samu na kunata yandi na kusala yina kele mbote, mpe kutumama.

<sup>25</sup> Mpe mosi ya mambu ya nene samu na Nzambi, na kati ya bamvula, landila disolo ya dibuundu, kele kuzwa muntu yina Yandi lendaka tula ya Muvimba na nsi ya luyalu ya Yandi. Yandi kele kaka na nsatu ya muntu mosi. Yandi ke sadilaka ntangu nionso muntu mosi na ntangu nionso. Beto longukaka yawu na

mwa bankokila me luta: muntu mosi, kimvuka ve. Yandi kele kaka na nsatu ya mosi. Yawu yina kaka Yandi ke zola. Samu, bantu zole ke vwandaka na mabanza zole. Yandi kaka, na yina, ke salaka kaka na muntu mosi, samu na kukitalisa Yandi mosi na nzila ya muntu yina. Ata mbala mosi ve ti Yandi salaka yawu na mutindu yankaka. Beno me mona?

<sup>26</sup> Ntangu yayi, Yandi ke baka Muntu mosi bubu yayi, mpe Muntu yina kele Yandi yina beto ke tanga kaka landila: Mpeve-Santu. Yandi kele Muntu yina Nzambi me fidisa, Mpeve ya Yesu Klisto na zulu ya ntoto, Mpeve ya Nzambi, samu na kumonikisa mpe kusamuna Klisto na nzila ya Dibuundu ya Yandi, beno me mona, samu na kulandila kaka Luzingu ya Klisto na nzila ya Dibuundu.

<sup>27</sup> Ntangu yayi, ya kele kima mosi ya mbote mingi, mpe—mpe dyaka ya kele mpasi ve, kana beto telama kaka mpe kubanza. Beto ke swasuka, beto ke tekita, beto—beto kele na boma, beto ke kota na kidi-kidi mpe na bantembe, beto ke banza kaka. “Mbote, mu fwana swasuka na . . .?” Ya ke mutindu yina ve. Ya ke kaka kuyambula, beno me mona, na kuzabaka ti beno kele kima mosi ve, mpe kubika Yandi kaka ya muvimba kuyala beno, kuyala mabanza ya beno, kuyala.

<sup>28</sup> Ntangu yayi, mu zola tuba ve ti kutambula na Klisto na—na mpeve ya mpamba. Mu zola tuba ve mutindu yina. Beno ke kwisa na Yandi na mabanza ya beno ya mbote, mpe ya kukikulumusa. Mpe na yina beno ke tuba, “Mfumu Yesu, munu yandi yayi. Ntangu yayi, ya me sonama awa na kati ya Ndinga ya Nge, ti Nge ‘vwandaka diaka na bima mingi ya kutuba na bilandi.’ Nge tubaka, ‘Ba lendaka ve kukanga ntima na yawu ntangu yayi.’” Mpe mu banza ti ya kele diambu ya beto bubu yayi, beto lenda ve kubakula yawu.

<sup>29</sup> Nzambi lendaka telemisa kaka mwa kima mosi ya kuswaswana, mpe na mbala mosi beto ke telemisa yawu. Na kisika ya kusosa Masonuku samu na kumona kana ya kele kieleka to ve, beto ke manga yawu na nswalu nionso, “Ya kele ve na kima mosi samu na yawu.” Beto fwana sosa bima yayi, samu na kuzaba kana ya kele kieleka to ve. Mpe beno bambuka moyo, kana ya kele ve ya kusungama, bawu ke kufwa na nsuka, samu Yesu tubaka, “Konso kimenisa yina Tata ya Munu ya Mazulu me kuna ve ba ke vusa yawu.”

<sup>30</sup> Kasi mu banza ti ya vwandaka Gamaliel yina salaka nsamunyu ya nene yina na ntangu yina, “Kana ya kele ya Nzambi, beto zola ve kuvwanda kuna samu na kunwanisa Yawu. Mpe—mpe kana ya kele ve ya Nzambi, ya ke kufwa na mutindu nyonso.” Na yawu, beno longuka yawu mpe beno banza na yawu.

<sup>31</sup> Mpe ntangu yayi, Yandi tubaka awa, “Kasi ntangu Yandi, Mpeve-Santu, ke kwisa.”

<sup>32</sup> Ntangu yayi, muntu mosi tubaka, mwa ntangu me luta ya vwandaka, yandi vwandaka zonza, yandi tubaka, “Mpeve-Santu kele kaka mabanza ya nge. Nge ke banzaka.” Yina ke sala Mpeve-Santu dibanza mosi.

<sup>33</sup> Kasi Biblia ke tuba, “Ntangu Yandi . . .” Mpe “Yandi” kele kiyingilu kimuntu. Beno me mona? Beno me mona? “Ntangu Yandi,” Muntu yayi, Mpeve-Santu, Nzambi, “ke kwisa, Yandi ke talisa bima yayi na beno, yina mu me tuba na beno.”

<sup>34</sup> Na yina, beno me mona, ya kele ve na mutindu yankaka ya kuzaba yinki kele Kieleka. Kaka na nzila . . . Beno lenda ve kuzwa yawu na nzila ya culture, na nzila ya banzingulu. Beno ke kuzwa yawu kaka na nzila ya Mpeve-Santu. Yandi kele Yina ba me fidisa samu na kutalisa Yawu.

Ntangu yayi, na yina, Yandi tubaka diaka, “Mpe Yandi ke talisa na beno mambu yina ke kwisa.”

<sup>35</sup> Ntangu yayi, ba-Hebreux, kapu 1, me tuba, “Nzambi na bantangu mingi mpe na mitindu mingi zonzaka na batata na nzila ya baprofete, kasi na kilumbu ya nsuka yayi na nzila ya Mwana ya Yandi, Klisto Yesu.” Beno me mona? Ya kele Mpeve-Santu ke na kubaka luyalu, to ke baka luyalu ya Dibuundu, samu ti Klisto kusala na kati ya Dibuundu. Na yina, beno me kuma mutindu Yandi vwandaka. Yandi kumaka mutindu beno vwandaka, samu ti beno kuma mutindu Yandi vwandaka. Beno me mona? Yandi kumaka beno, samu ti beno kuma Yandi. Ti, ya kele—ya kele na zulu ya lubakusu. Ya kele ve na mutindu ya kubangula yawu, mpe beno meka yawu ve. Beno ndima yawu kaka. Yandi zonzaka Yawu, mpe yina ke sukisa dyambu. Beno tuba kaka ti ya kele kieleka, beno kwikila Yawu.

<sup>36</sup> Ntangu yayi, mutindu Muklisto ya ntwenia, mu ke salaka nsamunu yayi ntangu nionso. Mu vwandaka na kiese ti Nzambi simbaka munu na ntwala dibuundu kusimba munu. Ya kele mpasi na kutuba yina mu vwandaka. Kasi mu—mu vutulaka matondo samu na lutwadusu mpe ngwisani ya kieleka ti Mpeve-Santu bendaka luzingu ya munu na yawu, na ntwala mu me yambula yawu. Na yina, mutindu mwana-bakala ya ntwenia, mu zabaka ya vwandaka na Kima mosi. Yandi vwandaka tuba, mpe mu vwandaka tuba na Yandi. Yandi vwandaka vutula mvutu na munu. Mpe mu bandaka na kubakula ti bima yina Yandi tubaka na munu, ntangu mu vwandaka mwana ya fioti, ti yawu bandaka na kusalama kaka kieleka mutindu Yandi tubaka ti yawu ke salama. Na yina mu zabaka ti ya fwana vwanda kieleka.

<sup>37</sup> Ntangu yayi, mu kele bakala ya kiboba ntangu yayi. Mpe mu—mu me vwandaka ata mbala mosi ve . . . Mpe mu lendaka bokila yinza na ku—kuvwanda swi, mpe kuyufula bawu. “Beno tula musapi ya beno na kima mosi yina Yandi me tubaka na munu, na MUTINDU ME TUBA MFUMU, na Nkumbu ya Mfumu, kasi yina vwandaka kaka kieleka mpe diambu, mpe

yawu ke salama, na kati ya bambala mafunda ya mafunda ya bima.” Yinki mu ke . . .

<sup>38</sup> Samu na yinki mu ke tuba yawu? Beno me mona, mu tulaka beto nionso na putulu ya volcan. Kasi yawu kele nsilulu ya Ndinga ya Nzambi. Na yina, mu ke vwanda ve na kivuvu samu na munu mosi. Beno lenda ve kuvwanda na kivuvu na beno mosi. Kasi, kintwadi, beto lenda tula kivuvu na Yina me salama na beto mosi. Mpeve-Santu me yala beto. Beto fwana tula kivuvu na Yawu. Mpe na yina beto ke tula kivuvu ya beto na Yawu, kuna bandandu ke kwisa.

<sup>39</sup> Ya ke vwanda na nganda ya mabanza samu na munu na kumeka ku—kukwanza na nsongi samu na kutuba na beno mwa bima yina ti Mpeve-Santu me sala na luzingu ya munu mosi ya kubeba, bilumbu ya munu. Mu ke tuba yayi na Biblia ya Yandi, Ndinga ya Yandi. Mpe yawu yina Yandi kele. Yandi kele Ndinga.

<sup>40</sup> Beno me mona, Nkuna yayi—yayi awa ke kwisa na mbombi ya volcan, na nzila ya Moyo ya kimpeve. Nzambi ke kwizaka mutindu Mpeve mpe ke salaka na nzila ya mbombi. Na yawu, ya kele muntu ve. Ya kele Nzambi.

<sup>41</sup> Mpe kana mu lendaka vwanda, mpe kubaka ntangu samu na kubasisa bima yina mu me monaka Yandi kusala, ya ke sala kinkuku ya babuku. Mpe kubanza na yawu, awa, na bamvula makumi tanu na tatu, mpe mu lenda tuba na ntuala ya Nzambi, Dibundu ya Yandi, mpe Biblia ya Yandi, na ntuala ya kimvuka yayi, ti, “Mu me monaka Yawu kubwa ve ata mbala mosi; ya ke salamaka na mutindu ya kulunga, ntangu nionso.”

<sup>42</sup> Katula, kilumbu yina ntangu mu katukaka na wesete. Beno landaka bande, mingi na kati ya beno, mu banza, beno ke bakula. Mu zaba ve yinki. Mu ke na kuingila. Mu kele awa ntangu yayi. Mu zaba ve samu na yinki. Mu ke na kuingilaka kaka.

<sup>43</sup> Ya lendaka vwanda ntangu ya munu ya kukwenda na yinzo. Ya ke monana mingi mutindu yina. Kana ya kele mutindu yina, muntu mosi ke telama na manima ya munu, yina ke landila Nsangu. Yandi ke vwanda muntu ya ngitukulu, kasi yandi ke telema na manima ya yayi mpe ke landila Nsangu. Mpe beno kuwa yawu. Ntangu nyonso ya kele Masonuku, beno bikana na yawu.

<sup>44</sup> Kana ya ke mutindu yina ve, ya ke na kitini yankaka ntangu yayi, samu mu ke kwikila ti beto ke zinga na bilumbu ya nsuka, mpe mu ke vutula matondo ti mu me zinga na kilumbu yayi. Mu lendaka sobisa ve kilumbu yayi na kilumbu mosi ve. Yayi kele kilumbu ya kulutila nkembo yina me vwandaka ntete na zulu ya ntoto. Ya ke na kilumbu yankaka ve yina me bakaka kilumbu yayi.

<sup>45</sup> Oh, yinki Moise lendaka sala, Elie, Paul, Silas, ba-héro yayi ya nene ya lukwikilu, na bilumbu yina me luta, ba lendaka telama mpe kubaka buku ya masolo, mpe kutala kieleka yina

bawu pesaka na profesu, kusalama, mpe kumona kisika beto kele na ntangu yayi? Kasi, ba zolaka tuba yawu na boloko, na ngunga mosi. Kieleka. Ba zolaka vwanda mutindu bantu ya nganzi, bayina ke kumata mpe ke kulumuka na babala-bala, kaka na mambu ya ngolo mutindu bawu lendaka kwenda, samu na kumwangisa Nsangu ya mbote. “Ntangu me kuma pene-pene.” Na yina beto ke mona, na nkokila yayi, ti beto kele ntama mingi na nkembo ya Nzambi.

<sup>46</sup> Kasi mu ke zola vutukila na mwa ntangu fioti, samu na kunata dibuundu. . .

<sup>47</sup> Na yina, Billy Paul kabulaka bakalati ya bisambu na yinzo-Nzambi yayi na nkokila yayi? Mu me katuka na Tucson mwa mnuti fioti me luta. [Muntu mosi me tuba, “Yinga.”—Mu.] Yandi—yandi kabulaka bakalati ya bisambu. Ntangu yayi, yina ke vwanda mutindu mosi ya mpasi na kumeka kunata bawu kuna. Beto ke meka yawu.

<sup>48</sup> Ntangu yayi, mu ke baka ntangu mingi ve, mu ke pesa kaka kimbangi na zulu ya Masonuku yayi.

<sup>49</sup> Ti, Klisto ke zitisaka Bandinga ya Yandi nionso. Yandi ke salaka yawu. Yandi fwana sala yawu. Beno me mona? Mu fwana sala yawu ve; mu kele muntu yina ke kufwa, yina ke salaka bifu. Yandi kele yina ke kufwaka ve, yina ke kubwaka ve. Yandi fwana zitisa dyambu ya Yandi. Beno me mona? Kasi mu fwana zitisa ve ya munu. Beno fwana ve kuzitisa ya beno. Kasi Yandi ke sala yawu. Oh, yina ke tula ve kima mosi na kati ya beno, samu na kuzaba ti Yandi kele—Yandi kele kieleka ya kukangama na Ndinga yina?

<sup>50</sup> Mpe, ti, na sabala yayi, wapi mutindu beto me mona na kati ya Biblia, na bapofete yina mpe bankooko yina, mpe konso ntangu ya ke talisa ti na ntangu dibuundu me kwenda ntama na yawu, Nzambi fidisaka muntu mosi kuna mpe ningisaka bawu kuna samu na kuvutula bawu diaka na Ndinga yina, samu na kusungika dibuundu. Ya kele konso ntangu mutindu yina. Yina kele mutindu ya kusala ya Nzambi. Yandi soolaka bantu na kusala yawu.

<sup>51</sup> Ntangu yayi, kana Yandi soolaka bambwetete samu na kulonga Nsangu ya mbote, yawu zolaka salama kubanda ntama. Bawu ke basika ata fioti ve na luzolo ya Yandi. Kana Yandi soolaka mwini samu na kulonga yawu, to mipepe samu na kulonga yawu, ata mbala mosi ve ti bawu ke basika na luzolo ya Yandi. Beno me mona?

<sup>52</sup> Kasi beto kele na zulu ya lufulu ya kimpwanza ya luzolo ya muntu. Beto lenda sala mutindu beto zola. Mpe ya kele samu na yina ti beto me pesa Yandi kiadi mingi na ntima. Beto ke zolaka ntangu nionso mutindu yayi, mpe beto ke zola kukotisa mitindu ya beto, mpe beto ke kwenda ntama na mitindu ya Yandi. Beno me mona?



53 Mpe mu—mu tubaka na ntwala, ntangu nionso muntu ke kumisaka Nzambi samu na yina Yandi salaka. Mpe yandi ke tubaka ntangu nionso yina Yandi ke sala. Na manima, na ntangu mosi, yandi ke zimbana yina Yandi ke na kusala. Beno me mona?

54 Muntu ke tuba, “Oh, Nzambi zibulaka Mubu ya Mbwaki. Yinga. Nkembo na Nzambi! Ya kele kieleka.” “Yinga, Yesu ke kwisa diaka. Alleluia! Ya kieleka.” Kasi, beno ke zonzila samu na Yandi bubu yayi? “Ah, ya vwandaka samu na kilumbu yankaka.” Beno me mona? Beno me mona? Ntangu nyonso yina Yandi me sala, yina Yandi ke sala, mpe ke zimbana yina Yandi ke na kusalaka.

55 Ya kele mutindu mosi yina ti Yesu Klisto monaka ntangu Yandi kwisaka na ntoto. Kieleka. Nzambi silaka yina Yandi salaka. Mpe awa Yandi vwandaka, ya kutelama na ntwala ya bawu, mpe bawu zabaka Yandi ve. “Yandi vwandaka na yinza, mpe yinza kusalamaka na nzila ya Yandi, mpe yinza zabaka Yandi ve.” Ya kele kieleka.

56 “Kasi bayina nionso me kuyamba Yandi, na bawu Yandi pesaka ngolo ya kukuma bana ya Nzambi.” Yina kele kitini ya nkembo.

57 Ya vwandaka na mwa ntangu fioti me luta, mwa vision mosi mu ke zola kutuba na beno. Mpe mu zaba ve, mbala yankaka mu me tubaka yawu kasi kaka samu na muntu mosi kisika mosi kuna. Kasi mu—mu me zimbisa mosi ya bantu ya kulutila nene na zulu ya ntoto yayi, samu na munu, mama ya munu.

58 Mpe mu—mu ke zolaka mama ya munu. Mu ke mona yandi kukwenda ntama na mesa, ntangu beto vwandaka bamputu, ntangu beto vwandaka ve na kima ya kudia! Mpe yandi... Papa vwandaka kwisa na ndambu ya mampa, kisika yandi vwandaka kombula magazini mosi, to kima mosi, mpe—mpe ba ke mwangisa yawu na zulu ya yawu, na manima ba ke tula sukadi na zulu ya yawu. Mpe mama vwandaka sala mutindu yandi vwandaka ve na nzala, samu ti beto bana kuzwa kima ya kudya. Oh, mu—mu lenda zimbana yawu ata fioti ve. Beno me mona? Mpe bambala mingi yandi vwandaka baka munu, mpe bima yina yandi salaka samu na munu. Kasi, beno zaba, Nzambi kele—kele kaka ya kifuluka mingi na mawa. Yandi ke bakula bima yina nionso, ntangu Yandi fwana baka yawu. Mpe mu—mu ke zolaka Yandi samu na yawu.

59 Ya ke salamaka ntangu nionso, ti, na ntwala bantu ya munu kufwa, mu ke monaka yawu na vision, ntete yawu salama.

60 Mu monaka mpangi ya munu ya bakala, ntangu mu vwandaka kaka na bamvula pene ya kumi na nana, kumi na yivwa. Mu monaka yandi ntete yandi kwenda. Mu vwandaka ntete Muklisto ve, kasi mu monaka vision kukwisa na ntwala ya munu, mu monaka mpangi ya munu ya bakala kukwenda.

Mu monaka tata ya munu ntangu yandi kwendaka.

<sup>61</sup> Howard, mingi na kati ya beno ke bambuka moyo na Howard. “Howard,” beno ke bambuka munu moyo, bamvula zole na ntwala yawu salama, mu tubaka, “Howard, mu monaka kisika ya nge ba me sonika. Nge ke landa.” Mu tubaka, “Sungama, mpangi-bakala, samu ti nge ke landa.” Mpe yandi salaka yawu, kieleka kaka. Na manima, awa mwa bilumbu me luta . . .

<sup>62</sup> Ntangu yayi, mu ke banza ti diambu yayi ke wakana mafingu ve, kasi, kaka samu na kutalisa mawa ya Nzambi. Nzambi ke kipeke ntangu nionso bima ya fioti, mutindu mosi na bima ya nene. Mu zola kutuba yayi samu na ndandu ya milongi yayi ya mbote. Yina lendaka vwanda . . . Mpe mu ke kukilosa munu mosi na kati ya yawu.

<sup>63</sup> Ntangu yayi, beto ke zolaka, beto nionso, kuvwanda Billy Graham, kasi beto . . . Mpe beto nionso ke zolaka kuvwanda Oral Roberts. Kasi, beto, beto kele ve Billy Graham to Oral Roberts. Beto kele kisadi ya Nzambi na kilanga yina Yandi tulaka beto. Beno me mona? Ata mutindu ya kele fioti, to mutindu ya kele nene, ya kele kaka mutindu mosi na meso ya Nzambi, ntangu nionso mutindu mosi, samu na kusala kaka na kisika beno kele. Ntangu nionso, ya kele kima ya nene samu na kulanda Mfumu.

<sup>64</sup> Mu ke zola nunga . . . to kukwenda mpe kuzwa dibuundu ya bantu makumi tanu na kati ya yawu, na luzolo ya Nzambi, na kisika ya kuvwanda na mafunda tanu yina kele na nganda ya luzolo ya Nzambi. Kieleka. Nzambi lendaka sala mingi na muntu yina kele na luzolo ya Yandi, na ngunga mosi, ti Yandi lendaka sala na muntu yina kele na nganda ya luzolo ya Yandi, na bamvula makumi tanu. Beno me mona? Yandi ke na kutitiba mpe ke na kutekita, mutindu kubula munduki na kati ya mudidi. Kasi ntangu muntu kele kieleka na luzolo ya Nzambi, mpe zaba lubokilu ya yandi, yandi ke vwanda kuna.

Mpe ntangu yayi, ba-vision, mutindu Mfumu Nzambi ke salaka na yawu. Munu . . .

<sup>65</sup> “Ntangu Yandi, Mpeve-Santu ke kwisa, Yandi ke talisa bima yayi Mu me tubila beno.” Ntangu yayi, ya kele ve na nsatu ya kubakula yawu, na mutindu yankaka. Yandi kele Nsoniki. Ya kieleka yandi fwana zaba yina Yandi sonikaka. Beno me mona? Biblia ke tuba ti Yandi sonikaka yawu. “Ata mpe bantu ya ntama, vwandaka na nsi ya lutwadwasu ya Mpeve-Santu, samu na kusonika Ndinga.” Mpe kana Mpeve-Santu kele Nsoniki ya Ndinga, ya kieleka Yandi zaba mutindu kutendula Yawu mbote kulutula yina beto ke sala. Bika ti Yandi sala ntendulu ya Yawu. Mpe beno zaba wapi mutindu, mutindu Yandi ke tendula Yawu? Ntangu yayi, beno kondwa bima yayi ve kana beno ke kwiza na lukutakanu ya kubeluka ya nzutu. Beno tala. Beno kondwa yayi ve. Wapi mutindu Yandi ke tendula Yawu? Na nzila ya

yayi, na kusiamisaka Yawu, beno me mona, na kusalaka Yawu mutindu yina.

<sup>66</sup> Yawu yina Yesu tubaka. “Benoni longuka Masonuku. Na kati ya Yawu beno ke banza ti beno kele na Luzingu ya Kukonda nsuka; mpe Yawu kele Yina ke tuba Nani Mu kele. Yawu Bayina ke zonzaka samu na Munu. Mpe nani lenda fundisa Munu? Nani lenda fundisa Munu na disumu?” *Disumu* kele “kukondwa lukwikilu.” “Kana mu ke sala ve bisalu yina ba sonikaka samu na Munu, na yina beno kwikila Munu ve. Kasi kana Mu ke sala bisalu yango, mpe beno lenda ve kukwikila na Munu, na yina beno kwikila bisalu, samu ti Ndinga zonzaka yawu.” Benoni me mona? Yina kele kaka mutindu ya mbote, ya konso kilumbu.

Ntangu yayi, Nzambi, “Makabu mpe balubokilu ba ke sobaka yawu ve.” Beto zaba ti Biblia me tuba mutindu yina. Ba ke salaka yawu.

<sup>67</sup> Yina me sala kaka, pene ya bamvula zole ntangu yayi. Mu vwandaka . . . Na suka mosi mu vwandaka tambula na yinzo, mpe mu vwandaka na kiti. Ntangu yayi, ya ke monana ya ngitukulu mingi, ti Nzambi ke kotisa niama. Mutindu mpangibakala mosi ya ntalu, na vision yina ya Mazulu, ya mwa reportage yina mu kuzwaka; mu ke kwikila ti mu tubaka yawu na beno, mbala mosi, to mwa lukutakanu mosi. Yandi sonikilaka munu mukanda kilumbu yina, mpe tubaka . . . Ndinga ya Bantu ya Mumbongo bakaka yawu. Yandi tubaka, “Ya vwandaka . . . vision ya nge vwandaka mbote mingi, Mpangi Branham, lubangulu ya nge. Kasi, widikila, ya vwandaka mbote mingi ti nge tubaka mpunda ya nge, yina nge vwandaka mata, kwisa kutula yintu ya yandi na dipeka ya nge.” Yandi tubaka, “Ya ke vwandaka ve na bampunda kuna na Mazulu, Mpangi Branham. Mazulu me salama samu na bantu, samu na bampunda ve.” Mbote, mu banzaka . . .

<sup>68</sup> Mbote, bambala mingi, beno ke monaka muntu ya mutindu yina, beno fwana kutendula bima nionso, ba ke meka kusola kima mosi. Benoni me mona? Benoni lendaka ve kutendula Nzambi, na mutindu nionso. Benoni fwana kaka kukwikila Yandi.

<sup>69</sup> Kasi ya zolaka kuyangidika yandi. Mu tubaka, “Mpangibakala, mu tubaka ata fioti ve ti mu vwandaka kuna na Mazulu. Na vision, mu yufulaka Yesu, mpe ba tubaka ti Yandi kele na zulu kuna. Mu vwandaka mutindu na paladiso. Kasi, samu ti ya lenda sadisa beno, Biblia me tuba, na Buku ya Apocalypse, ti, ‘Yesu kwisaka na Mazulu ya mazulu, na zulu ya mpunda ya mpembe. Mpe makesa nionso ya Mazulu vwandaka landa Yandi, na zulu ya bampunda ya mpembe.’ Na yina ya fwana vwanda na ndambu kuna na Mazulu.”

<sup>70</sup> Nzambi ke sepelaka na bima nionso. Yandi ke sepelaka na mwa bima ya nene yina beno ke salaka, to bima ya nene yina beno ke salaka. Yandi ke sepelaka na mutindu beno ke kebaka

kimvuka ya fioti ya mameme ya beno, to beno muntu yankaka ke keba kimvuka ya nene ya mameme ya beno. Yandi ke sepelaka.

<sup>71</sup> Mwa ntangu me luta, mpangi ya munu ya bakala ya mbote, beto vwandaka kuna na . . . kuloba na kisika mosi. Mu katukaka, na balukutakanu, mpe mu vwandaka pema. Beto vwandaka loba na bankodia, mpe beto kangaka kinkuku ya mbote ya bambisi. Mpe na nkokila yina beto vwandaka loba na bandobo mingi, mpe beto vwandaka kondwa bampambu. Ntama kuna na manima ya midi, mu basikaka samu na kukanga mwa mintanda ya bambisi, mwa bambisi yayi ya fioti. Lendaka ve . . . Beno lendaka kudia yina ya nene, kasi yayi kele mwa bambisi ya fioti. Mpe mu balulaka nsinga ya ndobo, mu losaka nsinga ya ndobo, mu vwandaka kanga bawu, mu vwandaka tula bawu na kati ya kitunga.

<sup>72</sup> Mpe Kima mosi bulaka munu, mu vwandaka na zulu ya masuwa yayi. Mwana-bakala yayi vwandaka Mbangi ya Yehowa, mpe mpangi ya yandi ya bakala vulukaka mpe yandi fulukaka na Mpeve-Santu, mpe na yawu bana-babakala zole vwandaka na beto. Mpe mutindu mu vwandaka kanga bambisi yayi, beto nionso, Kima mosi bulaka munu. Mpe mu tubaka, “Beno zaba, ya ke vwanda na mvumbukulu ya luzingu mosi, mutindu mwa niama mosi.” Mbote, mwa niama mosi ya fioti.

<sup>73</sup> Ntangu yayi, mingi na kati ya beno ke bambuka moyo na Ndinga yina basikaka, yina tubaka, “Ya ke vwanda na mwana-bakala ya fioti ke vumbuka na lufwa, ba ke tuta yandi na tomabilu.” Mpangi Jack Moore kele na munu na nkokila yayi, yina vwandaka kuna na Finlande ntangu ya salamaka. Beno me mona? Mingi na kati ya beno awa ke bambuka moyo ti mu tubaka yawu na nzila awa, beno me mona, mu zonzaka na beno na kusonika yawu na buku ya beno. Beno tala.

<sup>74</sup> Mpe Mpangi Wood balukaka, Mpangi Banks Wood, mwana ya yandi ya bakala kubelukaka, na kimbevo ya polio. Mpe yandi balukaka mpe tubaka na mpangi ya yandi ya bakala, “Nge tala mbote. Kima mosi zola salama.” Mu landilaka na kukanga bambisi, beno me mona. Na yina beto tulaka bandobo ya beto na bambisi.

Na nkokila yina beto kangaka kima mosi ve.

<sup>75</sup> Na suka yina landaka mu tubaka, “Ya vwandaka kaka na mwa muntanda mosi, ya fioti, kuna.”

<sup>76</sup> Yandi tubaka, “Tala, na yina, nge tubaka ve ti ya ke vwanda na mvumbukulu mosi ya luzingu?”

Mu tubaka, “Yinga.”

<sup>77</sup> Mu ke tuba na beno, ntangu mu katukaka na yinzo, ya vwandaka . . . Mwana ya munu ya kento . . . Beto kele mutindu ya . . . Beno lendaka vwanda na yawu kana beno me zola yawu, ntangu yayi, beno me mona, kasi mu ke vwandaka na boma ya

niawu. Mpe na yawu mu—mu ke zolaka ve kuvwanda na nsatu yina ya boma beno ke kuzwaka pene-pene ya yawu. Mpe na yina beto ke vwandaka na yawu ve na yinzo, mpe—mpe mu ke kwikila ti niawu lendaka bakula ti mu kele na boma ya yawu. Na yina, tata ya munu vwandaka na boma ya baniawu. Na yina, kuna, bana ya munu ya bakento zabaka kukondwa kuvwanda na baniawu kuna. Mpe mwa . . .

<sup>78</sup> Mwana ya munu ya kento vwandaka tambula na nzila na mwana-kento yankaka ya fioti, mpe yandi vutukaka, na mawa nionso na kizizi, mpe yandi tubaka, “Papa?”

Mu tubaka, “Yinki nge zola, cherie?”

Yandi tubaka, “Kima ya boma me salama.”

Mu tubaka, “Yinki ya kele?”

Yandi tubaka, “Kana nge zabaka yawu kaka!”

Mu tubaka, “Mbote, tuba na munu.”

<sup>79</sup> Yandi tubaka, “Muntu mosi me losa mwa niawu mosi ya fioti, kuna na bala-bala.” Mpe yandi tubaka, “Kima yango me belama na kufwa, lendaka ve kutambula.” Mpe yandi tubaka, “Papa, ya ke yangisa kana beto kupesa yawu madia mpe kukipe yawu?”

<sup>80</sup> Mu tubaka, “Ya kieleka ve. Kana beno zola kupesa yawu madia, beno sala kaka keba. Beno bika yawu ve kutula beno manzaka.” Mu tubaka, “Bika mu mona niawu yango.”

<sup>81</sup> Na yina ntangu ba nataka niawu yango kuna, mu bakaka sanduku, mpe, na yina, na suka yina landaka beto vwandaka na kinkuku ya muvimba ya bana ya niawu.

<sup>82</sup> Mpe kuna, na yina, mwana—mwana ya munu ya bakala, ntangu mu vwandaka kwenda, mwa Joseph ya fioti, yandi vwandaka tala yawu. Oh, yandi banzaka ti yawu vwandaka kitoko, beno zaba, yawu vwandaka mata kuna, beno zaba. Mpe—mpe na yina yandi bakaka mosi na diboko ya yandi; yandi kangaka yawu mwa ngolo fioti, yandi bikaka yawu kubwa na zulu ya beton. Mwa kima yayi ya fioti bandaka na kubaluka, kubaluka. Mu banzaka “Oh, la la!”

<sup>83</sup> Mpe mu banzaka, “Mbote, ntangu yayi, yina lenda vwanda mwa mwana ya niawu ya kuyela, ntangu mu ke vutuka na yinzo.” Beno ke bambuka moyo na diambu ya opossum. Mu banzaka, “Mbote, ya lenda vwanda mwana ya niawu yina.” Na yina beto vwandaka kuna na mwa crique mosi ya fioti, samu na kuloba, mpe beto vwandaka kanga ba-poisson lune yayi ya yinda ya kitoko kuna, beto vwandaka losa yina ya fioti na manima.

<sup>84</sup> Mpangi Lyle, mpangi-bakala ya Mpangi Banks, vwandaka loba na yinti ya yinda, na ndobo ya nene, mpe kinkuku ya nene ya bampambu na zulu ya yawu. Yandi bikaka mwa poisson-lune yina kumina ndobo yina na mwa kivumu ya yandi. Mpe ntangu yandi bendaka yandi, yandi tubaka, “Ntangu yayi, mu

ke tala *kuna*,” pene-pene ya yinda mutindu *yayi*. Mpe yandi. . . Yandi lendaka ve kubasisa ndobo, mu banza. Mutindu yankaka vwandaka ve; yandi zengaka kaka nsinga. Mpe yandi zolaka kukeba ndobo ya yandi. Na yina yandi bendaka kaka mazafu, kivumu mpe nionso, na nganda ya yandi, mutindu *yayi*, mpe losaka yandi kuna na masa. Mpe yandi—yandi tekataka mbala tatu to yiya mpe yandi tandamaka kuna. Yandi tubaka, “Nge me benda kinkuku ya nge ya nsuka, nkundi ya fioti.”

<sup>85</sup> Mu tubaka, “Lyle, ntangu yandi ke banda na kutatika. . . Baka ndobo ya fioti mingi kulutila yina. Ntangu yandi ke banda na kutatika, baka musapu yayi ya banzini ya kutanda kuna, mpe kaka ntangu yandi ke banda na kutatika, kanga yandi. Beno me mona? Ntete yandi kotisa yawu kuna mpe yandi mina yawu, yandi kanga yawu na yinwa ya yandi.” Mu tubaka, “Yina ke ngalalise ya kukanga bawu.”

<sup>86</sup> “Ah,” yandi tubaka, “Mu vwandaka benda na mutindu ya yimbi,” mpe yandi kwendaka kaka na ntwala. Mpe yandi mekaka mwa bantangu fioti, mpe kondwaka mbala tatu to yiya. Mpe yandi tululaka kima yango, yandi tubaka, “Mu ke bika kaka yandi kumina yawu dyaka.”

<sup>87</sup> Na yina mwa mbisi yayi vwandaka na zulu ya masa kuna samu na mwa, oh, mu banza, baminuti makumi tatu. Mpe bitembo bandaka na kumata mpe kwisaka.

<sup>88</sup> Mu tubaka, “Mbote, ntangu me bika fioti beto fwana kwenda. Beto ke na kantini mosi ntangu yayi, samu ti beto kwenda.”

<sup>89</sup> Mpe mu telamaka, samu na kulosa yawu kuna na mwa ba-nénuphar, samu na kuningisa yawu. Ya vwandaka na mwa kivumu ya nene ya mbwaki kuna. Na yina mu bandaka, mu bendaka pambu na ba-nénuphar, beno zaba, mu vutulaka yawu kuna na ba-nénuphar, mpe mu ningisaka yawu, mutindu beno bampangi ya babakala mpe beno bakento me zaba samu na yina me tala kuloba.

<sup>90</sup> Mpe ntangu mu bandaka na kusala yawu, na mbala mosi, Kima mosi kulumukaka na kati biwanda yina kuna, kaka mutindu kupanzana ya Mupepe. Mpe Yawu vwandaka na zulu ya munu. Mu kitisaka yinti, mpe mu telemaka na kati ya masuwa. Mpe mu talaka na nziunga. Mu kuwaka Ndinga kutuba, “Nge ke mona mwa mbisi yina ya fioti?” Mpe yandi vwandaka kuna, ya kulala kuna.

<sup>91</sup> Mu tubaka, “Nge ke mona mwa mbisi yayi?” kaka mutindu Yandi tubaka yawu. Mwa makalu ya yandi lembaka, mpe yandi vwandaka, ya kutandama na zulu ya masa kati-kati ya ngunga. Mpe Biblia yayi kele ya kuzibula ntangu yayi. Beno me mona?

Mpe Yandi tubaka, “Tuba na yandi, mpe vutula na yandi luzingu ya yandi.”

92 Mpe mu tubaka, “Mwa mbisi ya fioti, na Nkumbu ya Mfumu Yesu, mu ke vutula na nge luzingu ya nge.”

93 Mpe babakala yina vwandaka ya kutelama kuna, ke tala. Mwa mbisi yina ya fioti balukaka na zulu ya mukongo ya yandi, mpe kotaka na kati ya masa mpe yandi kwendaka. Bawu zolaka kona. Lyle sukulaka kizizi ya yandi na kati ya masa. Yandi tubaka, “Mu ke vumbuka na manima ya mwa ntangu fioti.” Yandi tubaka, “Mu—mu banza ti mu ke na kulota.”

Mu tubaka, “Nge ke lota ve.”

94 Mpe kaka na ntangu yina, mu banza ti mu vwandaka na bana makumi tatu to makumi yiya, na lutangu ya bisambu, yina vwandaka na kimbevo ya misisa. Mpe wapi mutindu Nzambi kwendaka kuna, na bana yina vwandaka na kimbevo ya misisa, mpe telemisaka mwa mbisi yina ya fioti, ya ke talisa kaka ti Yandi ke sepelaka na bima nionso.

95 Samu na yinki Yandi sadilaka ngolo ya Yandi samu na kusinga yinti ya fiki, ntangu ya vwandaka na bamafunda ya bambevo ya wazi na diboko? Mpe Yandi bikaka bambevo yina ya wazi mpe kwendaka kuna mpe singaka yinti ya fiki, mpe tubaka, “Muntu mosi ve ke kudia mbuma ya nge,” mpe yinti ya fiki yumaka. Yandi sadilaka ngolo ya Yandi, samu na katalisa ti Yandi ke sepelaka na bayinti. Yandi sepelaka na mbisi.

96 Yandi ke sepelaka na beno. Yandi ke sepelaka na munu. Mpe Yandi ke sepelaka kumona Ndinga ya Yandi me monisama, mpe Yandi ke vingila beto kusala yawu, samu beto kele bantu ya Yandi. Kima mosi ve kele na kati ya beto. Ya kele Yandi; beto ke kukipesa beto mosi mpe ke tambula na Yandi.

97 Mu monaka vision na suka yina. Mu monaka niama mosi ya nene me tandama na lweka ya kiwanda. Oh, ya vwandaka na bibongo ya nene ya nzoko. Mu vwandaka na nzietolo ya kuzomba na vision yayi, pene ya ngunga kumi to kumi na mosi na kilumbu. Mpe mu bumbamaka kuna mpe mu kufwaka niama yango.

98 Mpe na yina na kuvutuka, nzoko mosi, ulusu mosi ya nene ya grizzly teleminaka munu na nzila, mpe mu kubulaka yandi.

99 Mpe na manima mu monaka bawu kubaka bibongo, mpe mwa diboko mosi basikaka mpe simbaka bibongo yango, tulaka ruban na zulu ya yawu. Ya vwandaka na kitezo ya mètre mosi kubanda na zulu ya lufulu tii na zulu ya kibongo, mètre mosi na yinda. Mu me monaka ntete ve niama ya yinda mutindu yina, bansongi ya nene na zulu ya kibongo ya yandi. Mpe, kasi, ya vwandaka monana mutindu mbambi mosi, kasi, oh, la la, ya vwandaka sala mbambi zole to tatu. Mu me monaka ntete ve kima ya mutindu yina.

100 “Mbote,” mu tubaka, “ya ke salama kaka kilumbu mosi. Mu ke sonika yawu kaka.”

101 Mu kwendaka kuna na Kentucky na nkundi ya munu, mpe Mpangi Miner Arganbright bokilaka munu, yandi tubaka, “Mpangi Branham, nge ke na kisalu ya mingi?”

102 Mu tubaka, “Ya ke sala mpasi mingi ve.” Mu tubaka, “Mu vwandaka na . . . Mu me kuzwa basabala zole ntangu yayi. Mu kele na mwa konze.”

103 Yandi tubaka, “Nge ke kwenda na Canada, na Alaska, na munu. Beto ke yidika nkinzi ya Bantu ya Mumbongo na Anchorage mpe diaka kuna na Fairbanks.”

Mu tubaka, “Ya ke wakana mbote mingi, kana mu lenda kuzwa ntangu ya kusala yawu.”

104 Yandi tubaka, “Mbote, Mpangi Branham, kana nge ke sala yawu, mu ke tuba na nge ti, beto ke pesa nge kuzomba ya kitoko ya ba-ulusu grizzli.”

105 Mu banzaka, “Oh, yina ke wakana mbote.” Mu banzaka, “Oh, oh, vision yawu yina. Beno me mona, yawu yina.”

106 “Kuzomba ya kitoko ya ba-ulusu grizzli,” mu tubaka, “yina ke wakana mbote. Mu ke kwenda ve samu na yawu. Kasi, ntangu beto ke telema kuna, mpe mwa bantwadisi ke zola kubasisa munu, na mpamba, mu ke vwanda na kiese ya kukwenda.”

Na yawu, yandi tubaka, “Mbote, bawu—bawu ke sala yawu. Beto me yidika yawu.”

Mu tubaka, “Mbote, ntangu yayi vingila. Bika mu sambila samu na yawu.”

107 Mpe mu kwendaka na kati ya mfinda kilumbu yina, mpe ntangu nionso mu sambilaka, mu kwendaka ntama mingi, ntangu nionso, ntama kaka na yawu. Mu banzaka, “Yina kele ngitukulu.” Mpe bilumbu zole na manima ya yina, mu bokilaka Mpangi Arganbright. Mu tubaka, “Ve.”

108 Yandi tubaka, “Mpangi Branham, beto me yidika kaka bima nionso.”

109 Mu tubaka, “Kusala yawu ve. Mpeve-Santu me fundisa yawu.” Mpe mu tubaka na yandi vision. Mu tubaka, “Mu—mu zaba ve, Mpangi Arganbright, kasi ya ke yitukisa. Kasi Yandi ke bika munu ve kukwenda kuna, mpe, na kutala, ya ke wakana mutindu ti—ti ya ke vwanda kisika yango.”

Mpe yandi tubaka, “Mbote, ntangu yayi, beto nyonso me kubama na kukwenda.” Mpe mu tubaka . . .

110 Ntangu yayi, mingi na kati ya beno ke mona Mpangi Arganbright. Yandi ke kwisa awa ntangu yayi, samu na kukubama na munu, samu na kukwenda na bayinsi ya nzenza na manima ya lukutakanu yayi. Mpe na yawu beno lenda yufula yandi disolo. Na yina beto tubaka . . .

Mu tubaka, “Ve. Mu lenda kaka kusala yawu ve. Mpeve-Santu ke tuba na munu na kusala yawu ve.”



111 Ya kele mbote na kutumama, ata bambala yikwa, wapi mutindu ya ke monana mbote. Mu ke longa na zulu ya kima ya mutindu yina mbasi na nkokila, kana Mfumu kuzola. Na yawu ntangu yayi, beno bambuka moyo, ata wapi mutindu mbote ya ke monana, kana Nzambi kele ve na kati ya yawu, beno vwanda ntama na yawu. Wapi mutindu ya ke ngenga, beno vwanda ntama na yawu. Wapi mutindu ya ke kwenda na ntwala, beno vwanda ntama na yawu kana Nzambi kele ve na kati ya yawu. Beno vwanda ntama na yawu. Ntangu yayi beto ke zonzila yawu mbasi na nkokila, kana Mfumu kuzola.

112 Ntangu yayi, na yina ntangu mu vutukaka na yinzo, Billy tubaka na munu, mwana ya munu ya bakala, yandi tubaka, “Papa, nge zaba muzombi yina nge kwendaka zomba na yandi na printemps yina me luta kuna, na nkumbu ya Southwick?”

113 “Oh,” mu tubaka, “kuna na . . . na nsi . . . na nsi ya Yukon kuna?”

Yandi tubaka, “Yinga.”

Yandi tubaka, “Yandi kele na mukanda awa samu—samu na nge.”

114 Yandi kele Mpangi Eddie Byskal, yina kele mfumu ya kimvuka ya balongi na yinsi yina kuna na nord-ouest, mwana-bakala mosi ya mbote, ya lenda vwanda awa na lukutakanu yayi. Yandi ke na manaka ya kukwisa awa na mbala yayi. Mwana-bakala ya mbote, mpe yandi kele na dibuta ya mbote. Yandi kele—yandi kele missionarye kuna ntangu yayi na ba-Cri, ba-Cri Indien. Mpe mu vwandaka na yandi kaka na automne me luta. Mpe na yina . . . To, na été me luta, mu zolaka tuba.

115 Na manima yandi, Eddie, zolaka nata munu kuna na yinzo ya Bud, yina vwandaka mosi ya bandimi yina yandi twadisaka na Klisto. Kento ya yandi vwandaka Pentecotiste ya kukwikama. Bud vwandaka fermier, mpe yandi me kuma kaka ntama ve. Kasi ba zengilaka yandi kitini ya ntoto, kisika ba basisaka ba-Indien mpe tulaka bawu na kisika ya banzenza, kizunga ya nene samu na kuzomba. Pene ya sambanu . . . Oh, mu banza yandi kele na pene ya ba-mile nkama tatu ya carré, to kulutila, na nziunga kuna, samu na kizunga yina ba zengilaka yandi na luyalu ya Canada.

116 Mbote, yinto yina ya masa, ntangu mu vwandaka kuna, beto kwendaka zomba ba-ulusu na manima ya lukutakanu, kasi ntangu beto . . . na Ngonda ya tanu, kasi chinook kwisaka mpe zengaka beto. Beto vwandaka pene . . . Yandi me kuwaka kima mosi ve samu na balukutakanu, mpe Eddie landilaka kaka na kutuba na yandi samu na balukutanu.

117 Mpe yandi tubaka, “Nge zola ve kutuba na munu ti, bubu yayi, ti Nzambi ke kukitalisa Yandi mosi, mpe ke talisa bima yina ke kwisa na ntwala yawu kusalama?”

Eddie tubaka, “Ya kele kaka kieleka.”

<sup>118</sup> Na yawu yandi landilaka na kusolula na munu. Yandi tubaka, “Nge zaba, mu ke na mpangi ya bakala yina kele na épilepsie.” Yandi tubaka, “Kana nge lenda kutana kaka na mpangi yina ya bakala!” Yandi tubaka, “Mu banza ti, kana mu lenda nata yandi na balukutakanu ya nge, mu ke kwikila ti yandi ke beluka.” Mu tubaka . . . Yandi tubaka, “Yandi ke vwandaka na yawu luzingu ya yandi nionso.”

Mu tubaka, “Mbala yankaka mutindu yina.”

<sup>119</sup> Mbote, ya ke vwandaka ve mpimpa na zulu kuna na ntangu yayi ya mvula, beno zaba. Mwini ke dindaka kaka, mpe ke basika . . . Oh, beno lenda, na konso ntangu yina, na kati-kati ya mpimpa, na ngunga mosi, beno lendaka telama kaka, kutanga zulunale, konso kima yina, beno me mona. Mpe pene—pene ya kitini ya nsuka ya Ngonda ya tanu mwini ke dindaka ata fioti ve. Ya ke kaka na mpasi mwa bitini, ya ke zimbana, pene ya bamuniti kumi, mpe ya ke kwisa vutuka. Na yina beto ke lala kaka na ntangu nionso beto me lemba.

<sup>120</sup> Mpe na manima ya kubasika ya beto, beto kutanaka na nkonga ya ba-Indien. Mpe, oh, mu kele na mfumu ya kiboba kuna na manima. Ba me bika yandi kuvwanda kuna samu ti yandi vwandaka na bana zole. Ba ke zikaka bana ya bawu na kati ya kitini ya yinti, bankundi ya bawu ya luzolo. Mutindu ya nsambulu. Mpe ba vwandaka tula bawu na kati ya yinti, na yina ba vwandaka bika kaka ti dibuta kuvwanda kuna. Mpangi-bakala ya mbote ya kiboba, yina me luta bamvula makumi yivwa, yina me vwanda na kiti ya yandi kaka mutindu mosi ya bana ya yandi ya babakala.

<sup>121</sup> Mpe na yina beto kwendaka kilumbu yina landaka. Yandi tubaka, “Ya kele ve na mutindu ya kuzabuka ntangu yayi. Beno mata na zulu ya bamongo mpe mutindu *yayi*.” Oh, ya vwandaka na bakilometele nkama mosi na tanu, samu na kuzenga remorque. Na yawu, beto vwanda lenda ve kusala yawu. Ntangu lutaka mingi. Beto vutukaka manima.

<sup>122</sup> Mpe na kuvutuka, Bud vwandaka na kinkuku ya bampunda ya ntwenia, mpe bayankaka na kati ya yawu kubwaka na kati ya muskeg mpe nionso yina. Mpe mu vwanda kwenda na ntwala kuna, mu vwanda zona, mpe, Eddie mpe munu. Mpe Bub vwandaka na zulu ya mpunda ya ntete, ya vwandaka meka na kubasika. Beto vwandaka na yintu ya makumi tatu na mosi. Mpe mu tulaka nsinga na zulu ya mosi, mu basisaka yandi. Mpe kaka na ntangu yandi basikaka, na manima mpunda ya munu mosi ya kiti kotaka. Mpe mu vwandaka kuna, ke basika kuna. Mpe mu vwandaka na poto-poto mpe nionso . . . Na mwa minuti fioti, mu mataka na zulu ya mpunda ya munu, mpe mu katulaka poto-poto na bilele ya munu, mutindu *yayi*, mu kwendaka.

123 Mpe kaka na ntwala ya munu, na zulu ya mongo yina, kwizaka ntwenya mosi ya bakala. Mu talaka yandi. Mu vutukaka na zulu ya kiti mpe telemisaka mpunda ya munu. Mpe mu monaka yandi me kona, ke landila mpe ke landila, mpe ke basisa fulu-fulu, yandi kumaka kieleka na lufundu, mpe vwandaka kaka kupanza bima nionso. Mpe na manima yandi vwandaka swi. Mu monaka mbalambongo ya ntama. Mu monaka simisi ya yandi me yokama.

124 Eddie vwandaka na kati-kati ya kinkuku ya bayinzo na ntwala ya munu, yandi vwandaka meka kubaka mpunda yankaka. Mpunda ya ntwenia basikaka mbangu na nzila, samu na kukota kuna, ya vwandaka katula ba-paké na zulu ya yandi, ya vwandaka dumuka. Na yina mu kwendaka mbangu kuna na Eddie. Beto lembikaka mpunda. Mu tubaka, “Eddie, mu ke na MUTINDU ME TUBA MFUMU samu na Bud.”

Yandi tubaka, “Mpangi Branham, yinki me salama?”

Mu tubaka, “Vision. Mu monaka mpangi ya yandi ya bakala.”

Yandi tubaka, “Oh, kanga yandi.”

125 Mu tubaka, “Kanga bampunda. Mu ke ningisa ya munu mpe kukwenda na ntwala, yandi kimaka mbangu kuna na bampunda yayi, kutala kana mu lendaka kanga bawu mpe kukeba bawu na lweka ya mongo.”

126 Mu kwendaka mbangu pene-pene ya falaise, mutindu *yayi*, na mpu- . . . na zulu ya mpunda ya munu. Mu pusaka yandi kuna, mpe mu mataka kuna. Mpe mu tulaka diboko ya munu na zulu ya kiti. Mu tubaka, “Bud?”

Yandi tubaka, “Yinga, Mpangi Branham.”

127 Mu tubaka, “Mu zola kutuba na nge kima mosi. Mpangi ya nge ya bakala . . .” mpe tubaka na yandi nionso.

Yandi tubaka, “Yinga. Nani me tuba na nge?”

Mu tubaka, “Muntu ve. Mfumu me talisa kaka yandi na munu.”

Mu tubaka, “Nge ke kwikila na munu mutindu kisadi ya Yandi?”

Yandi tubaka, “Ya kieleka, Mpangi Branham.”

128 Mu tubaka, “Kulumuka,” pene—pene ya kilomètre mosi na ndambu na civilisation, “kwenda baka mpangi ya nge ya bakala beno kwisa awa. Mpe mbala ya ntete yandi kona . . .” Mu tubaka, “Yandi ke vwandaka na yawu kubanda bamvula zole. Beno lendaka ve kukwikila yawu, kasi ya kele ya dibuta. Nkooko ya nge ya bakala vwandaka na yawu.”

Yandi tubaka, “Ntangu yayi, ya kele kieleka. Ya kele kieleka.”

129 Mu tubaka, “Ntangu yayi, ntangu mwana-bakala yayi ke kona, beno katula simisi na mukongo ya yandi mpe beno losa yawu na tiya, mpe kutuba, ‘Mu ke sala yayi na Nkumbu ya Yesu Klisto, landila Ndinga ya Yandi.’ Yandi ke vwanda na yawu ata fioti ve, ntangu nionso yandi ke kwikila yawu.”

130 Yandi telemisaka kaka maboko ya yandi, yandi bandaka na kuboka. Yandi tubaka, “Mu me monaka yawu ve kusalama, kasi nge me tuba na munu kaka mutindu mpangi ya munu bakala vwandaka monana, mpe nge me tuba na munu kieleka samu na nkooko ya munu ya bakala.”

Mu tubaka, “Ya kieleka.”

131 Na manima beto kwendaka, yandi kwendaka mpe bakaka mpangi ya yandi ya bakala. Mpe yandi basikaka samu na kuzenga nzila na suka yina, ntangu yandi mataka na bus (yina ke kwisaka, ke lutaka mbala zole to tatu na sabala mosi, ke mata mpe ke kulumuka na bala-bala ya Alaska), yandi kwendaka kuna . . .

132 Mpe kento ya Bud, Lila, kele kaka mwa kima ya fioti, kento mosi ya fioti, pene ya nene ya barre ya savon na manima ba me sadila yawu na dibuta. Kaka mwa . . . Ba ke na bana tanu, mpe mwa kento mosi ya lembami.

133 Mpe na yina Bud basikaka samu na kukubika bampunda ya yandi, samu yandi ke kwenda samu na kuzenga nzila, na yina beto lendaka vutuka na nzila yina na bazombi ya yandi.

134 Mpe kaka na ntangu yandi kwendaka, mbote, mpangi ya yandi ya bakala kuna na kati, kukondwa kukatula bilele ya yandi ya kitoko, yandi konaka. Mpe ba vwandaka zinga na kati ya caserne mosi ya ntama, kisika ba-Américain, ntangu ba vwandaka tunga bala-bala, vwandaka na yawu kuna. Mpe ntangu . . . Ba vwandaka na mbalambongo ya ntama mutindu cuisinière. Mpe Lila ya fioti . . . Yandi kumaka—yandi kumaka kukondwa bukebi ntangu yandi vwandaka na bakukona yina. Mpe yandi vwandaka na boma ti yandi ke kufwa, mpe yandi zolaka zibula nela, *kima mosi to yankaka*, yandi basikaka na nzila. Kasi yandi bandaka na kudumuka, mpe yandi banzaka yina ba tubaka. Yandi vwandaka na mosi ya balukutakanu, kuna na Dawson Creek.

135 Yandi kwendaka nswalu kuna, mpe yandi lemukaka bakala yayi ya nene, yandi katulaka simisi yina na mukongo ya yandi, dilaka, yandi zibulaka ba-bouton mpe nionso yina, kinkuti ya yandi ya mpembe, yandi kwendaka kuna na cuisinière, mpe tubaka, “Mu ke sala yayi na Nkumbu ya Mfumu Yesu, landila Ndinga ya Mfumu yina ba tubaka na beto.” Mpe yandi me kubwaka ata fioti diaka ve kubanda kilumbu yina. Yina sukisaka yawu.

136 Yandi bokilaka munu na kukwisa, kuzomba ya mpamba. Mpe mu ke vingilaka ntangu nionso bima yina kele ya mpamba,

beno zaba. Na yawu mu banzaka, “Mbote. . .” Mu tubaka, “Mu ke kwenda. Mu ke tala kana Mfumu ke bika munu kukwenda.” Mu sambilaka. Mpe kaka kulutila ve kusambila, mambu nionso ke tambula kaka mutindu yina.

137 Mu bakaka Mpangi Fred Sothmann. Yandi kele awa kisika mosi na lukutakanu. Wapi kisika nge kele, Fred? Yandi yina. Yinga. Yandi kele mosi ya ba-administrateur ya dibuundu ya beto. Mpangi Fred zaba ti ba tubaka yayi bangonda tatu na ntwala yawu kusalama. Ya kieleka, Mpangi Fred? Mpe, mu banza, Mpangi Simpson. Bantu yikwa kele na kati ya kivinga yayi na nkokila yayi yina me zaba yawu, na ntwala ya salama, ba tubaka yawu? Beno telemisa maboko ya beno. Yawu yina. Mpe ba tubaka na ntwala ya dibuundu, kieleka yina ke salama. Mbote, mu zabaka ve ti yayi kele ntangu yango.

138 Na yina mu kwendaka kuna na bala-bala ya Alaska, mpe Mpangi Fred telemaka na yinzo ya nkundi mosi, samu na kwenda kuzomba ba-élan. Ya kele ntama mingi kuna samu na ba-élan. Na yina beto kele na yinsi ya mameme, kisika beto vwandaka kwenda. Mpe na yina beto. . .Mu bakaka kitini ya—ya mpemba to mvindu, mpe yemaka na zulu ya pare-brise. Mu tubaka, “Ntangu yayi, Mpangi Fred, na yawu kana yayi kele ntangu, nge ke bambuka moyo kieleka yina ya ke vwanda.” Mpe yandi ke bambuka moyo na yawu.

139 Mu mataka kuna. Na mpimpa yina ntangu mu kotaka na camp, Bud tubaka, “Mpangi Branham!” Yandi kangaka munu ngolo mpe lemukaka na zulu ya munu, na kutubaka na bandinga ya malu-malu mpe ke boka, beno zaba. Yandi tubaka. . .Mpe yina, cowboy mosi ya kiboba ya mutindu ya ngolo, diaka. Mpe yandi—yandi vwandaka sambila Nzambi. Yandi tubaka, “Nge zaba yinki, Mpangi Branham? Mpangi ya munu ya bakala me konaka diaka ve kubanda na ntangu yina. Yandi kele na mavimpi ya mbote mpe yandi kele mbote, mvula mosi na ntwala.”

140 Mu tubaka, “Kana yandi kwikila yawu, ya ke landila mutindu yina.” Mpe mu tubaka, “Ntangu yayi tuba na yandi na kubika luzingu ya yandi na Klisto, mpe kusadila Yandi luzingu ya yandi ya muvimba. ‘Kwenda mpe sumuka dyaka ve, to kima ya yimbi ke salama na zulu ya yandi.’ Beno me mona?” Mu tubaka, “Tuba na yandi na kusala yawu ntangu yayi.”

141 Na yina mu tubaka, “Mu kele na vision yankaka,” mpe mu tubaka na yandi vision yango. Mu tubaka, “Ntangu yayi, ya vwandaka na mwa bampangi ya babakala na munu. Beto vwandaka na nzietolo ya kuzomba. Ba vwandaka babakala ya fioti. Mpe mosi na kati ya bawu vwandaka me lwata ya vert, ya karo-karo.”

142 Mpe yandi tubaka, “Mbote,” yandi tubaka, “Mpangi Branham,” yandi tubaka, “Mu kele ve na simisi ya vert, ya karo-

karo.” Mwana ya yandi ya bakala, Blaine, ya bamvula makumi na nana, tubaka, yandi kele ve na simisi ya vert ya karo-karo.

<sup>143</sup> Eddie Byskal, mpangi-bakala yankaka ya fioti, pene ya bakilo makumi yiya na yivwa, yandi tubaka, “Mu kele na mosi ve, Mpangi Branham.”

Mu tubaka, “Mbote,” mu tubaka, “ntangu yayi, niama . . .”

Yandi tubaka, “Wapi mutindu ya niama ya vwandaka?”

Mu tubaka, “Ya monanaka mutindu mbambi.”

<sup>144</sup> Yandi tubaka, “Ya kele ve na mbambi kuna na zulu. Yayi kele na zulu mingi.” Yandi tubaka, “Mu banza ya vwandaka caribou.”

Mu tubaka, “Caribou ke vwandaka na pano.”

Yandi tubaka, “Ya kele ya kieleka.”

Mu tubaka, “Yayi vwandaka na bansongi.”

<sup>145</sup> Yandi tubaka, “Mbote, Mpangi Branham,” yandi tubaka, “beto ke kwenda na kizunga ya mameme, kizunga ya bambambi ve to kima ya mutindu yina.”

<sup>146</sup> Mu tubaka, “Mbote, mu banza yawu kele kaka nzietolo yankaka. Mpangi Arganbright . . . Ya lendaka vwanda kisika mosi kuna na Alaska,” mu tubaka, “samu ya vwandaka nzoko, grizzli ya nene.”

Yandi tubaka, “Wapi mutindu ya grizzli yawu vwandaka?”

Mu tubaka, “Ya bibongo ya palata.” Ya kele yina me zabana mingi na kati ya bawu.

<sup>147</sup> Yandi tubaka, “Mu kele ntwadisi. Mu ke vwandaka na kati ya bayinti yayi awa luzingu ya munu nionso. Mu me monaka ata fioti ve ulusu ya bibongo ya palata.” Yandi tubaka, “Mu me monaka kaka grizzli ya ntama. Kasi,” yandi tubaka, “Mu me monaka ve ulusu ya bibongo ya palata, mu me monaka mosi ve na luzingu ya munu.”

<sup>148</sup> Mu tubaka, “Mbote, ya kele na yankaka, kisika mosi kuna, mpe mu ke kwenda kubaka yandi.”

Yandi tubaka, “Mu ke tuba ti yina kele kieleka.” Yandi tubaka, “Mu ke tuba yawu.”

<sup>149</sup> Beto kwendaka, bilumbu tatu na manima. Beto salaka camp ya kutelemisa, na zulu ya ndilulu ya mfinda.

<sup>150</sup> Mpe Nzambi sadisa munu, kana ya ke bikala mutindu yina tii na Millenium, bika mu zinga kuna na ntangu ya Millenium. Mu ke zolaka kaka kubula na yinza yina kuna. Oh! Muntu nyonso lenda ve kumona Nzambi kuna, ba kele—kele mpofo, bantu ya kufwa makutu, mpe bababa. Kaka kumona Yandi ke kukitalisa Yandi mosi na bamongo yina ya nene, ya banzoko! Oh, la la! Mudindu ke bokilaka mudindu, na yina, mpe kuna na zulu kaka kuvwanda na ntangu ya nkembo.

151 Na yina beto mataka na zulu ya mongo mosi. Beno fwana tambula kaka ya kusungama, mutindu *yayi*, kaka samu na kutelemisa yawu. Oh, kukondwa yinti, ya ke kaka mousse ya caribou kele kaka yina beno ke monaka. Beto monaka pene ya bayintu makumi tatu to makumi yiya ya mameme. Ya vwandaka ve na yina ya nene mingi na kubaka. Ya vwandaka kaka mwa ba-mètre sambanu, mpe ba-centime makumi zole na tanu. Mu—mu zolaka mosi ya nene mingi kubasika kuna, na yina na kumataka ntama mingi. Na yina beto . . . Mu kulumukaka diaka.

152 Mpe kilumbu yina landaka beto zabukaka, mpe Eddie kubwaka na kati ya masa ntangu yandi zabukaka, na basapatu ya nene na makulu.

153 Na kumataka na simu yina ya mongo, Bud telemaka mpe tubaka, “Pesa munu maneti ya nge, Billy.” Mu pesaka yandi maneti.

154 Beto vwandaka tambula fioti, mpe beto vwandaka zonza samu na yina me tala Mfumu, mpe beto vwandaka boka, mpe beto vwandaka kima mbangu na zulu mpe na nsi ya lweka ya kiwanda, beto vwandaka kaka na ntangu ya nkembo. Ya kele mbote na kukwenda, kusala nzyetolo ya kuzomba, kana beno ke kwenda na bampangi-babakala.

155 Mpe na yina yandi bakaka maneti ya munu. Yandi tubaka, “Mpangi Branham, tala dimeme ya nge ya bakala. Ya kele pene na nana na kati ya bawu ya kulala pene ya ba-kilometre yivwa na ndambu, kaka kuna na zulu ya piki yina yankaka. Beno tala yawu. Beno me mona yawu kintwadi?”

Mu bakaka yawu. Mu tubaka, “Mu ke tuba, yawu yayi, ya kieleka.”

156 Yandi tubaka, “Mbote, beto lenda vutuka kuna, kubanda ngunga ya tatu na suka.” Mu tubaka, “Beto lendaka vwanda kuna na zulu na ngunga ya yivwa, to na ngunga ya kumi. Mameme ya babakala ke vwanda ya kulala kuna. Ya ke vwanda kaka na ntangu yina.”

Mu tubaka, “Yinki bima yankaka ke tambulaka kuna?”

157 Mu tubaka, “Ya kele ba-Caribou.” Mu tubaka . . . Na yina, ba-kilometre yivwa ntama kuna, beno zaba, ya kele mpasi na kutuba na yina ya me fwanana.

158 Mpe na yina, kubanda kuna, ba-kilometre nkama yivwa na makumi sambanu na tanu na ndambu, bisika bangoyi-ngoyi ke pumbukaka, ya kele ve na mwa nzila to nzila mosi. Mpe ntangu beno ke kuma na Côte Ouest, beno ke kwenda pene ya ba-kilometre funda mosi na nkama zole na makumi nana na sambwadi na Vancouver, ya kele ve ata civilisation ya fioti. Mpe ba-civilisation yina ke landa, na kukwendaka mutindu *yayi*, kele na Anchorage, pene ya ba-kilometre funda mosi na nkama mosi na makumi zole na sambwadi to funda mosi na nkama zole na

makumi nana na sambwadi. Na kuvutuka mutindu *yayi*, beno ke kota na mbanza mosi ya fioti, na Couteau jaune, kisika beno ke baka masuwa mbala mosi na mvula samu na kukwenda na ba-Eskimos. Mpe, na kulanda, beno ke kuma na Russie. Na yina, beno kele kaka beno mosi. Ya kele kisika yina Nzambi lenda baka lepo ya Yandi, kuna na zulu, na bampasi ya beto nionso mpe bakumekama yina beto tulaka Yandi. Na yina mu ke zolaka kumata kuna mpe kuzonza na Yandi ntangu Yandi kele na lepo, beno me mona, na manima ntangu mutindu ya vwandaka na nkokila me luta na—na masuwa.

<sup>159</sup> Na yina ntangu beto vutukaka, mpe na suka yina landaka beto bandaka na ngunga ya mbote. Kuna pene ya ngunga ya nana, beto zabukaka nseke ya nene mpe nionso, ti kuna beto kumaka na zulu ya mongo. Mpe na kumataka kuna na zulu, awa kwisaka kiboba mosi ya ngombe ya caribou, mpe ngombe ya bakala ya yinda ya kitoko. Yandi kwendaka, mataka na zulu ya mongo, mpe ba-pano ya nene na zulu ya yandi. Mpe mu tubaka, “Mbote, mpe na yina ya kele caribou ya ntete mu me monaka ve na kati ya mfinda, na nseke. Mu me vwandaka ata fioti ve awa na ntwala.”

yandi tubaka, “Yinga. Yina kele caribou.”

<sup>160</sup> Na yina beto kwendaka na zulu ya mongo mpe beto vwandaka tala. Dimeme vwandaka ve kuna. Na yina Bud mpe munu vwandaka tambula. Mpe Eddie bandaka na kukota kuna, mpe Blaine, mwana ya yandi ya bakala, vwandaka sosa niama mosi.

<sup>161</sup> Mpe beto kwendaka kuna, mpe, oh, la la, mu bokaka kaka, “Nkembo na Nzambi!” Mu talaka kuna, mpe ya vwandaka na bamongo ya nene ya kufuluka na mvula-mpembe; mousse ya caribou ya jaune na nsi ya mvula-mpembe. Mpe kaka kuna na nsi ya vwandaka na yinti ya matiti ya ngolo, yina vwandaka sapin mosi ya nkufi. Mpe mu kulumukaka fioti na nsi, ya vwandaka buck brush, ya mbwaki. Na mwa ntwala fioti na yina, vwandaka quaking aspen, ya jaune. Nionso yina vwandaka talisa na dyanga kuna na nsi ya yawu. Oh, la la!

<sup>162</sup> Bud mpe munu tulaka kaka maboko ya beto na zulu ya mosi na yankaka, mpe vwandaka bina kaka mwa jig kuna, beto vwandaka tuba kaka ngolo mpe vwandaka kuboka, mpe kukumisa Nzambi. Mpe beto vwandaka na maboko ya beto na zulu ya mosi na yankaka, mpe beto vwandaka kumisa Nzambi. Mpe beto kuzwaka ntangu mosi ya mbote, mu banza, pene ya bangunga zole.

<sup>163</sup> Mpe mu tubaka, “Tala, mu ke kukiyufula yinki me salama na Eddie?” Beto vwandaka bokila yandi “Ngunza.” Na yawu, beto vutukaka. Beto kwendaka na lweka yankaka ya mongo. Mu tubaka, “Yandi lendaka ve kuzimbana awa.”



164 Mpe mu tubaka, “Ve. Blaine kele kuna na manima kisika mosi kuna, mpe yandi kele Indien.”

165 Na yina beto talaka na nziunga, mpe mu monaka camera mosi ya film ba me tulula kuna. Mu tubaka, “Ya vwandaka ya Eddie.” Mu talaka na simu yina ya mongo. Mpe mu kwendaka kuna na lweka *yayi*, mpe yandi kwendaka nzila yankaka.

166 Mpe Eddie vwandaka sala, “Shit-shit-shit-shit.” Yandi vwandaka zomba mwa ngombe ya bakala, ya caribou. Mpe yandi zolaka kukulumusa yandi, kupesa yandi madia na bankundi ya ba-Indien kisika yandi vwandaka missionaire. Na yina, yandi kufwaka caribou. Beto kulumukaka mpe sukulaka yawu.

167 Beto vutukaka, ya vwandaka pene ya ngunga mosi. Beto monaka diaka bampunda ya beto ya bakiti, pene ya ba-metre nkama tanu na ndambu kuna, kisika ba vwandaka ya kutelama. Mpe beto vwandaka ya kutelama kuna. Yandi tubaka, “Mpangi Branham, nge ke zolaka kutambula?”

Mu tubaka, “Ya kieleka mu ke zolaka yawu.”

168 yandi tubaka, “Kana beto mata mongo yayi . . . Mameme yina lutaka mutindu *yayi*, mpe kulumukaka na dibulu yina yankaka kuna, mu banza. Kana ba lutaka kuna ve, ba kwendaka na lweka *yayi* yankaka.” Tubaka, “Beto bika Eddie mpe bayankaka kuvutuka, mpe kuluta na kitini yayi *awa*, mpe baka mpunda ya munu ya kiti mpe mpunda ya nge ya kiti, mpe kuvutula caribou na camp. Mpe beto ke tambula kaka na zulu awa mpe beto ke kuma kisika yina. Mpe beto lendaka kuma kuna pene ya ngunga kumi to kumi na mosi na nkokila yayi.”

Mu tubaka, “Mbote. Beto ke sala yawu.”

169 Na yina, beto vwandaka ya kutelama kuna. Beto kudiaka kaka kinzanza mosi ya sardine, kitini mosi, mosi na mosi ya beto. Mpe beto zikaka na nsi ya mousse, ba-sardine yayi. Mpe dimpa ya beto, beto vwandaka na yawu na kati ya simisi ya beto, mpe tokaka tii kuna yawu kumaka nionso kitini mosi ya nene. Kasi ya vwandaka mbote, ntangu beno kele na nzala. Mpe ya kele mbote mingi. Na yina, beto telamaka kuna.

170 Mpe mu vwandaka tala kaka na nziunga. Mpe mu talaka na kati ya maneti. Mu tubaka, “Makasa, tala awa. Yinki yina kuna?”

171 Pene ya ba-kilomètre yiya na ndambu kuna, vwandaka caribou yina. Mpe ya vwandaka yina ya ngitukulu. Yandi vwandaka na ba-pano; ya vwandaka na bibongo ya yinda. Mu tubaka, “Nge ke bambuka moyo? Tala awa. Ya kele na kifwanusu mosi ya nene, ya kele kaka kieleka. Mpe kuna vwandaka niama yina, kaka mutindu yina.” Mu tubaka, “Ya kele kaka na kima mosi ke pekisa vision, muntu mosi na simisi ya vert, ya karo-karo.” Mpe Eddie vwandaka ya kutelama kuna na simisi ya vert,

ya karo-karo. Mu tubaka, “Mu banzaka ti nge vwandaka ve na mosi.”

<sup>172</sup> Yandi tubaka, “Kento ya munu fwana tula yawu na kati ya paquet. Ntangu mu kubwaka na masa, mazono, mu sobaka, basimisi.” Yandi tubaka, “Mu zabaka ve ti yandi tulaka yawu na kati kuna, Mpangi Branham. Lemvokila munu samu mu me tuba na nge diambu ya kieleka ve.”

Mu tubaka, “Nge zolaka sala kaka mutindu yina, mwana.”

<sup>173</sup> Oh, Bud bandaka na kuboka. Yandi tubaka, “Nge lenda telama kaka awa mpe kufwa yandi, bakilometele yiya na ndambu ntama kuna. Nge lenda ve, Mpangi Branham?”

Mu tubaka, “Landila vision, mu vwandaka kaka na zulu ya yandi.”

<sup>174</sup> Yandi tubaka, “Mpangi Branham, mu ke tuba na nge, wapi mutindu nge ke kwenda kuna?”

Mu tubaka, “Mu zaba ve, kasi mu ke kwenda kuna.”

Na yina yandi tubaka, “Wapi mutindu nge ke kwenda?”

Mu tubaka, “Mu ke kwenda pene ya kifwanusu yayi ya nene.”

<sup>175</sup> Yandi tubaka, “Ya kele ditadi mosi mutindu ditadi.” Mpe munu. . . Mu tubaka, “Kana nge kota kuna, nge ke vwanda na mafunda ya ba-tonne ya mvula-mpembe na zulu ya nge, na sekonde mosi.”

<sup>176</sup> Mpe mu tubaka, “Mfumu ke keba yawu. Mu kwendaka mutindu yina na vision, kaka kuna na lweka.”

Yandi tubaka, “Mbote, mu ke landa nge.” Awa yandi me kwisa.

<sup>177</sup> Mpe bana-babakala yayi tubaka, “Beto ke vwanda awa ntangu yayi tii kuna beto ke mona nge ke kuzwa caribou yango,” mpe bawu tubaka, “na yina beto ke—beto ke kulumuka kuna, kubaka bampunda mpe kulandila nzila ya beto. Beto ke kutana na beno kuna na nsuka ya tirage, pene, oh, pene ya bakilometele sambanu to nana kuna na nsi.”

Yandi tubaka, “Mbote mingi.”

<sup>178</sup> Na yina beto kwendaka kuna, Bud mpe munu. Na kati-kati ya ngunga mosi, beto salaka na nziunga kuna. Mpe caribou yina vwandaka kuna, ke tala beto, mpe monaka beto ata fioti ve. Yandi fwana vwanda me kulala. Mpe beto mataka na mwa coupure mosi, mpe beto vutukaka, mpe beto mataka kuna na ba-mètre makumi zole na sambwadi na yandi. Kuna yandi vwandaka. Nzoko yayi, niama ya nene, telamaka kuna, mpe mu kuzwaka yandi.

<sup>179</sup> Mpe na manima ya mwa ntangu fioti beto vwandaka ya kuvwanda kuna, ke kwenda kuna na nsongi, mpe nionso yina, katuka kuna, mutindu yina, Bud tubaka, “Nge tubaka ti

bibongo yayi vwandaka na ba-centimetre makumi sambwadi na sambanu?"

Mu tubaka, "Ya kele kaka kieleka."

180 Yandi tubaka, "Mpangi Branham, ya fwana vwanda nkama na makumi yiya na zole," na yintu ya nene mingi.

Mu tubaka, "Ve. Ya kele kaka kieleka makumi yiya na zole."

Yandi tubaka, "Mu kele na ruban ya kutesila kuna."

Mu tubaka, "Nge ke tula ntembe na yawu?"

Yandi tubaka, "Ve, tata."

181 Yandi tubaka, "Kasi, vingila fioti, nge tubaka na munu ve ti nge ke kuzwa ulusu ya nene ya grizzli na ntwala nge ke vutuka kuna? Ya ke vwanda na bibongo ya palata, na ntwala nge ke vutuka kisika mwana-bakala yina vwandaka, na simisi ya vert?"

Mu tubaka, "Ya kele kieleka."

182 Yandi kuna na manima ya kiwanda. Mbote, ya ke vwandaka ve na kima ya yinda mutindu *yayi*, kima mosi ve. Kaka mousse, nionso beno ke mona, na ba-kilometre na ba-kilometre, ke balukaka na mousse ya kiwanda. Yandi tubaka, "Wapi kisika yandi kele, Mpangi Branham?"

183 Mu tubaka, "Yandi lenda pesa mosi yankaka. Yandi tubaka mutindu yina." Mu tubaka, "Nge ke tula ntembe na yawu, Bud?"

Yandi tubaka, "Ve, tata."

184 Mbote, ntangu beto vwandaka kulumuka na kiwanda, beto vwandaka kwisa mutindu *yayi*. Yandi vwandaka zangula munduki na mwa ntangu fioti, mpe mu vwandaka baka yintu, na manima yayi to yina. Beto vwandaka tambula kaka na lweka, beto vwandaka kulumuka, bibongo yina ya nene vwandaka kombula mousse. Mpe beto kumaka pene ya ba-mètre nkama mosi na makumi sambanu na yawu. Beto telamaka mpe beto vwandaka tala bisika nionso. Yandi tubaka, "Kiboba ya ulusu yayi ke sala mbote na kumonana, mutindu yina ve?"

Mu tubaka, "Yinki—yinki nge ke banga?"

Yandi tubaka, "Kima mosi ve."

185 Beto kwendaka kuna na zulu tii beto kutanaka na mwa glacier vwandaka kulumuka. Beto vwandaka kuna mpe beto pemaka fioti. Yandi tubaka, "Mpangi Branham, banza kaka na yawu," yandi tubaka, "beto me kuma ntete ve kuna, oh, ya me bikana kati-kati ya kilomètre mosi na ndambu samu ti beto kutana na bana-babakala yina, mpe kisika mosi kuna kati-kati ya awa mpe kuna nge ke kufwa ulusu ya bibongo ya palata."

186 Mu tubaka, "Ya kele kieleka. Ya kele kieleka." Yandi tubaka . . . Mu tubaka, "Nge ke na kutula ntembe na yawu, Bud."

187 Yandi telamaka mpe simbaka munu na diboko. Yandi tubaka, "Mpangi Branham, mpangi ya munu ya bakala me

konaka ata fioti ve kubanda kilumbu yina.” Yandi tubaka, “Nzambi yina lendaka tuba na nge mambu ya mpangi ya munu ya bakala, lenda vuna nge ve.”

Mu tubaka, “Bud, yandi ke vwanda kuna.”

Yandi tubaka, “Wapi kisika yandi ke katuka?”

<sup>188</sup> Mu tubaka, “Mu zaba ve, kasi,” mu tubaka, “Bud, mu kele na bamvula makumi tanu na zole,” (na yina), mpe mu tubaka, “Mu me monaka ba-vision, kubanda mu vwandaka mwana. Mpe ntangu mu monaka caribou yayi na zulu awa, yandi me kufwa, mpe nge ke tala kana bibongo ya yandi kele ve mètre mosi na ndambu. Mpe na manima, vision yina mosi, munu ntangu mu vwandaka vutuka kuna kisika nkundi yina vwandaka, yina mu vwandaka na yandi, Mu kufwaka ulusu yayi ya palata, ya grizzli.”

Yandi tubaka, “Mpangi Branham, mu lenda mona na ba-kilometre makumi tatu na zole.”

<sup>189</sup> Yandi tubaka, “Nzambi ke basisa yandi kaka na ntoto, to ke basisa yandi kuna na mazulu, to kima mosi.”

Mu tubaka, “Kuvwanda na boma ve. Yandi ke vwanda kuna.”

<sup>190</sup> Beto kwendaka pene ya kilomètre mosi diaka. Yandi vwandaka kaka ya kulemba diaka. Yina vwandaka na kilo pene ya makumi sambanu na nana, trophée yayi. Na yina, na kukulumuka na kiwanda, mpe yandi—yandi tululaka yawu. Yandi tubaka, “Fiu! Mu ke zola kuyambula.”

<sup>191</sup> Mu tubaka, “Yinga.” Beto kumaka na mwa sapin mosi ya nkufi, ya nkufi kuna, pene ya yinda mutindu *yayi*. Ya vwandaka na mwa ba-tétrás vwandaka pumbuka kuna, mpe ya vwandaka na bansusu ya lagopède, mpe na yina mu losaka bawu mwa matadi mutindu yayi.

Na yina yandi tubaka, “Nge me kudiaka ntete ve mosi ya bansusu yina ya lagopède?”

Mu tubaka, “Ve. Mu ke banza mutindu yina ve.”

<sup>192</sup> Yandi tubaka, “Ya ke vwandaka kitoko. Ba ke vwandaka kitoko mutindu ba-tétra.” Yandi tubaka, “Mpangi Branham?” Yandi katulaka yimpu ya yandi ya nene ya ntama mpe ya ndombe, vwandaka kufula mupepe yandi mosi. Yandi tubaka, “Ntangu me kuma pene-pene samu ulusu yina ya ntama kubasika, mutindu yina ve, mpangi?”

Mpe mu tubaka—mu tubaka, “Bud, nge ke tula ntembe na yawu.”

<sup>193</sup> Yandi tubaka, “Ve. Mu ke tula ntembe ve. Kasi, Mpangi Branham, mu—mu—mu ke na kubakula kaka ve.”

<sup>194</sup> Mu tubaka, “Munu ve diaka. Ya kele ve samu mu bakula. Ya kele samu mu kwikila.” Amen. Nzambi na Mazulu me zaba

ti bima yayi kele kieleka. Mu lendaka telama awa mpe kutuba yayi, kana ya vwandaka ve kieleka?

<sup>195</sup> Na nanimu mu bandaka na kubaluka, samu na kupesa yandi munduki, mpe mu bakaka yintu. Mpe ntangu mu balukaka, mu tubaka, “Bud, nge kele na maneti yina na nkingu ya nge. Yinki yina me telama kuna na zulu na lweka ya kiwanda?”

<sup>196</sup> Mpe yandi lwataka maneti. Yandi tubaka, “Oh, sadisa munu,” yandi tubaka, “kana ya kele ve miliki ya muntu!” Ya ke vwandaka ve na kima ya mutindu yina na yinsi. Yandi tubaka, “Yayi kele grizzli ya kulutila nene mu me monaka ntete ve na luzingu ya munu. Mpe na yina sadisa munu, tala mwini yina ya jaune ke sema na zulu ya yandi. Yandi kele ulusu ya bibongo ya palata.” Yandi tubaka, “Wapi mutindu nge tubaka ti yandi ke vwanda ntama?”

<sup>197</sup> Mu tubaka, “Yandi kele na pene ya ba-kilomètre tatu na ndambu kuna.” Mpe beto vwandaka me lwata me lembe mingi. Yandi tubaka. . . Mu tubaka, “Yinki beto ke na kuingila? Beto kwenda.”

Mpe yandi tubaka, “Nge ke ndima ti nge ke kuzwa yandi?”

Mu tubaka, “Ya kieleka mu ke kuzwa yandi.”

Yandi tubaka, “Yinki munduki yina nge ke sadila kuna?”

<sup>198</sup> Mu tubaka, “Ntangu yayi, mu ke kipe yawu ve.” (Mpe mwa munduki mosi ya fioti mpangi-bakala mosi pesaka munu na lukutakanu kilumbu mosi, bamvula mingi me luta.) Mpe mu tubaka. . . (Mwa munduki ya ntalu ya nsi, .270.) Mpe mu tubaka, “Mbote mingi. Mu bakaka. . . munu. . . Ya ke vwanda.”

<sup>199</sup> Beto landilaka kukwenda pene-pene fioti. Mpe mutindu beto kumaka pene-pene mingi, ulusu yina monanaka nene mingi yandi mosi. Oh, yandi vwandaka monana mutindu kinkuku ya matiti ya nzoko me vwanda kuna na zulu ya mousse yina, beno zaba. Nzoko ya nene, ya nene, me telama kuna, yintu ya nene mutindu *yayi*, beno zaba, mpe bambwanga ya kubasika, mpe bapatte ya nene. Mpe yandi vwandaka zenga mwa matangu yayi ya bambuma ya myrtille, mutindu *yayi*, beno zaba, ya vwandaka kudia yawu. Mpe ya vwandaka mutindu yina, kima yayi ya nene! Beto kwendaka pene-pene, oh, pene ya ba-metre nkama sambwadi na makumi tatu na mosi na yandi.

<sup>200</sup> Yandi tubaka, “Hé, Mpangi Branham, nge me—me kufwaka ntete ve grizzli?”

<sup>201</sup> Mu tubaka, “mu me kufwaka ba-ulusu mingi, Bud, kasi mu me kufwaka ata fioti ve grizzli ya bibongo ya palata na ntwala.”

<sup>202</sup> Yandi tubaka, “Nge zaba, muntu ya mbongo kele bitumba ya kulutila nene na kati ya bawu nionso.”

Mu tubaka, “Yinga, mu bakulaka yawu.”

Yandi tubaka, “Yandi zaba ve yinki mutindu kufwa.”

Mpe mu tubaka, “Mbote?”

203 Yandi tubaka, “Ve. . . Wapi—wapi—wapi mutindu nge kele ntama yawu? Wapi mutindu nge fwana kuma pene-pene na yandi?”

204 Ntangu yayi, beno yufula yandi kaka. Beno sonikina yandi mukanda. Mu ke pesa beno adresse. Yandi tubaka, “Muntu nionso kusonikina munu mukanda samu na yawu, yina me zola kusala yawu, samu na mosi ya mambu yina. Mu ke tuba na bawu.” Mpe na yina. . .

Mpe mu tubaka, “Mbote?” Mu tubaka. . .

Yandi tubaka, “Ntangu yayi?”

205 Mu tubaka, “Ve, ve. Mu vwandaka pene mingi kulutila yayi, Bud. Mu vwandaka kaka kuna na zulu, pene-pene na yandi.”

206 Yandi tubaka, “Beto me belama pene-pene mingi ntangu yayi. Yandi lendaka kufulusa na konso ntangu yina.”

207 Mu tubaka, “Mu zaba yawu. Kasi,” mu tubaka, “Bud,” mu tubaka, “ya ke vwanda mbote mingi.”

208 Yandi tubaka, “Ntangu yayi, kana nge ke bula ulusu munduki,” yandi tubaka, “ntangu yayi, Mpangi Branham, nge ke bula yandi munduki na mukongo. Nge fwana kubuka yandi, samu yandi ke landila kunwana, yandi lendaka ve kutelama kuna.”

Mu tubaka, “Ve, landila vision yina, mu bulaka yandi munduki na kati ya ntima.”

Yandi tubaka, “Mu banza ti nge me sala kifu ve.”

209 Mu tubaka—mu tubaka, “Mu me sala yawu ve.” Mu tubaka, “Mu ke bambuka moyo na yawu.” Samu, na kati—na kati ya vision mosi, beno kele na—beno kele na kati ya mabanza, mpe nionso zole, mutindu beto tendulaka yawu na nkokila yina. Beno kele na kati ya zole. Beno lenda ve kuzimbana yawu. Beno me mona? Na yina beno bawu yayi.

210 Na yina beto vutukaka diaka, pene—pene ya ba-mètre nkama mosi na makumi yiya. Yina vwandaka mwa masa ya fioti beto zabukaka. Mpe mu tubaka, “Yawu yina kaka samu na yina me tala yawu ntangu yayi. Tala yandi. Yandi kele ve kitoko?”

Yandi tubaka, “Yinga, mu banza ti yandi kele kitoko.”

211 Mpe—mpe mu tubaka, “Mbote mingi, Bud. Ntangu yayi ntangu mu ke telama awa, yandi ke kwisa.” Mpe mu tubaka, “Nge ke tala mbote kaka.”

Mpe yandi tubaka, “Mu ke tala mbote.”

212 Na yina mu tulaka disasi mosi na canon ya munduki, beno zaba. Mpe beto vwandaka kuna na nsi ya mwa masa yayi. Kaka mutindu mu telemaka, yandi kwisaka kuna. Oh, oh! Mu telemaka, mu bulaka munduki, mpe yawu wakanaka mutindu

tire-pois me bula yandi. Oh, ya me mekaka ata fioti mingi ve kutelemisa yandi diaka, ti kima mosi ve. Mpe, oh, na ntwala . . .

213 Beno ke zonzaka na mbangu! Mu me monaka ntete ve kima mutindu yina. Yandi, ya ke luta mpunda na mbangu, ulusu, to kima mosi, beno zaba, ulusu lendaka sala yawu, mutindu yayi. Yandi yina vwandaka kulumuka kuna na mongo, kaka na ntwala ya beto, mutindu yayi.

214 Mpe munu, na ntwala mu lendaka tula disasi yankaka na munduki, yandi kufwaka, pene, oh, pene ya ba-mètre makumi zole na sambwadi, makumi tatu na sambanu na munu, me vutuka kaka nsongi na nsongi; ya bakaka ntima, ba-poumon, mpe nionso, na yandi. Ya vwandaka disasi Nosler, beno yina ke tulaka disasi na maboko me zaba. Na yina yawu—yawu zangulaka yandi, mpe yandi kubwaka kuna.

215 Bud, vwandaka ya kutelama kuna, yandi vwandaka tala na zulu, ya vwandaka kieleka mpembe na yinwa. Yandi tubaka, “Mpangi Branham, mu zolaka ve ti yandi kwisa na makulu ya munu.”

Mu tubaka, “Munu mpe ve.”

216 Yandi tubaka, “Fiou.” Yandi tubaka, “Mu ke zola kutuba na nge, na manima ya yayi, mpangi. Kana ya vwandaka ve mosi ya ba-vision yina, mpe mu monaka me salama na ntwala, mu zolaka kwisa awa ata fioti ve, pene-pene mingi na ulusu yina, na nge.”

217 Mpe ata mosi ve na kati ya beto lendaka ningisa yandi. Yandi vwandaka na ba-kilo nkama yiya na makumi tanu na ndambu, mu banza, mutindu mosi, nzoko, kima yayi ya nene. Beto lendaka ve kusukula yandi, beto bakaka . . . katulaka yandi mpusu. Beto bandaka na nsi. Mpe beto tubaka . . . “Mpangi Branham?” Beto bakaka bibongo ya kisengo. Yandi tubaka, “Kana bibongo yina kele kieleka mètre mosi,” yandi tubaka, “Mu ke kubwa kaka ngambu.”

218 Mu tubaka, “Nge ke sala mbote na kuzwa yawu ntangu yayi, kuna, samu ti ya kele mutindu yina.”

219 Yandi tubaka, “Mu me monaka ata fioti ve . . . Ya ke monana ti mu ke na kulota yayi.”

220 Mpe ntangu beto kulumukaka kuna, mpe mu tubaka na—na Eddie, mu tubaka, “Ntangu yayi tala mbote. Blaine ke tula maboko ya yandi.”

221 Ntangu yayi, beno bambuka moyo, kuvwandaka na mwa diboko mosi pene-pene ya bibongo yina. Nge ke bambuka moyo, Mpangi Fred, mutindu mu tubaka na nge ti yawu ke vwanda?

Mpe mu tubaka, “Nge tala yawu mbote,” na Eddie.

Mpe na yawu Bud tubaka, “Vingila.” Yandi nataka mpunda ya yandi kuna.

222 Mpe beto beto vwandaka na ulusu na zulu ya beto, beno zaba, mpe bampunda yina vwandaka panza bima nionso. Beno zaba wapi mutindu ba ke salaka kana bawu me kuwa nsunga ya grizzli to konso mutindu yina ya ulusu. Na yina mu—mu kwendaka kuna, mu simbaka, mu mekaka kukanga mpunda yango, mpunda ya kiti vwandaka meka na kutina.

223 Mpe yandi kwendaka kuna mpe bakaka ruban ya yandi ya kutesila, mpe yandi kwisaka kisika yina kuna, yandi vwandaka tala munu, mutindu *yayi*. Mu tubaka, “Kwisa awa, Blaine.” Mu bulaka Eddie. Mu tululaka yawu na zulu ya yayi. Amen. Mpe na yina sadisa munu, mètre mosi, na zulu ya mbombo!

224 Ntangu yayi, bibongo fiotukaka pene ya ba-centimètre tanu ntangu yawu yumaka. Ulusu yina ya grizzli kele kuna na kati ya kivinga ya munu na salon ya munu, mpe bibongo ya yandi kele ya kunamika na zulu ya kibaka. Taxidermiste yidikaka yawu, mpe tulaka yawu kuna na zulu. Ya kele na ruban ya kutesila ya kunamika na zulu ya yawu, mètre mosi, ya kieleka.

225 Ntangu yayi, yinki Nzambi lendaka tuba na muntu samu na kima ya mutindu yina, samu na nzietolo ya kuzomba?

226 Ntangu mu vutukaka, mama vwandaka mbevo. Mu kwendaka tala yandi. Yandi tubaka, “Billy?” Beno me mona, Yandi vwandaka kindisa munu, ya vwandaka kukubika munu samu na kima mosi.

Mu tubaka, “Mama, Mfumu ke belulaka nge ntangu nionso.”

Yandi tubaka, “Billy, mu ke kwenda na Yinzo samu na kumona papa.”

“Oh,” mu tubaka, “mama, kutuba mutindu yina ve.”

Yandi tubaka, “Yinga, mu ke kwenda.” Mu sambilaka samu na yandi.

Mpe Mpangi Fred mpe bambangi nyonso yayi me kuvwanda awa kuzaba yawu.

227 Na yina, kima ya kulanda beno zaba, bawu nataka yandi na lupitalu. Dokotolo zabaka ve yina vwandaka tambula mbote ve. Mbote, mu kwendaka na kusambila samu na yandi. Yandi tubaka, “Mwana, mu ke kwenda.” Mpe ntangu yayi, mama ya munu vwandaka kento mosi ya ngolo, na mutindu nionso.

228 Kilumbu mosi, mwa bilumbu na manima ya yina, mu kwendaka kuna. Yandi vwandaka ya kutelama kuna, vwanda tala kaka na Mazulu. Yandi tubaka, “Billy, mu me mona nge.”

Mu tubaka, “Oh, kieleka, mama.” Yandi tubaka, “Mu me mona nge kaka awa.”

229 Yandi tubaka, “Oh, nge me kuma kiboba mingi, Bill,” yandi tubaka, “bansungi ya nge ya mpembe mpe mandefo ya nge kele kaka kudiembela kintwadi. Nge me tula diboko ya nge pene-pene ya kulunsi, nge tandaka yawu samu na kusimba



munu.” Mu vwandaka na dibanza ya mbote kuna, ya vwandaka mutindu yina.

Ntangu yayi, beno bampangi awa zaba ti ya kele kieleka.

<sup>230</sup> Kilumbu yina landaka vwandaka Lumingu. Mu vwanda longa. Bawu fidisaka munu ndinga, “Ya nge . . .”

Mu tubaka, “Mu ke kwikila ve ti mama ke na kukwenda. Nzambi ke talisaka munu ntangu nionso, bantu ya munu ke kwendaka. Kasi, mama, Yandi me talisa munu kima mosi ve samu na yawu.” Awa kwizaka nsangu mosi kuna. Mpe mu vwandaka kaka na kati-kati ya Nsangu ya munu, mutindu yayi. Muntu mosi kotaka, yandi tubaka, “Kwenda, kwenda na mama kaka na ntangu yayi. Bokila yandi na allo-allo. Yandi ke na kufwa, na muniti yayi.”

<sup>231</sup> Mu tubaka, “Lufwa, bika yandi swi. Ndinga ya Nzambi kele mfunu mingi kulutila yawu.”

<sup>232</sup> Bakala yayi me vwanda kaka awa, Mpangi Borders. Na manima ya bisambu, mu kwendaka tala mama ya munu. Mu kutanaka na Mpangi Borders. Yandi tubaka, “Mpangi Branham, nge kele ve kaka na mètre mosi na ndambu, kasi mu monaka bakala mosi ya ba-pied kumi na chaire na suka yayi.”

Mu tubaka, “Mpangi Borders, Nzambi ke keba nionso yina samu na mama.”

<sup>233</sup> Mpe mwa bilumbu fioti na manima ya yina, ba bokilaka munu kuna na kivinga, mpe ya kieleka yandi vwandaka kwenda. Yandi vwandaka na kati ya bana, yina vwandaka ya kutelema pene-pene ya mbeto. Mu tubaka, “Mama, nge ke kwenda kieleka?”

Yandi tubaka, “Yinga.” Na yina yandi lendaka dyaka ve kutuba.

<sup>234</sup> Mu vwanda tuba na yandi, “Yinki Yesu zola kutuba na nge, mama?” Mu ke bambuka moyo na ntangu mu botikaka yandi na Nkumbu ya Yandi, ntama mingi, kuna na kati ya masa. Mu tubaka, “Tuba na munu yina Yandi zola kutuba samu na nge ntangu yayi.”

Yandi tubaka, “Kulutila luzingu samu na munu.”

<sup>235</sup> Mu tubaka, “Mama, kana nge ke kwenda, mu kele mwana ya nge ya bakala, . . . mulongi. Mu zola zaba, na mama ya munu mosi yina ke kwenda kutana na Nzambi. Mu zola simba diboko ya nge awa, mama.”

Yandi tubaka, “Mu zola ti nge sala yawu.” Mu landilaka kusimba yawu kaka.

<sup>236</sup> Yandi lendaka ve kutuba. Ya monanaka ti yandi vwandaka ningana diaka ve, kizizi ya yandi. Mu tubaka, “Nge lendaka tuba diaka ve, mama?” Yandi lendaka sala ve. . . Mu tubaka,

“Widikila. Yesu kele kaka mutindu mosi samu na nge?” Yandi lendaka ve kuningisa yintu ya yandi.

<sup>237</sup> Na yina yandi kumaka na kisika yina yandi lendaka ve kuningisa yintu ya yandi diaka ve. Mu tubaka, “Mama, Yesu kele nionso samu na nge ntangu yayi? Yandi ke kwisa samu na nge, na mwa ntangu fioti. Nionso, samu na nge?” Yandi lendaka ningana ve.

<sup>238</sup> Mu tubaka, “Mama, nge kele kaka na kima mosi, nge. . . Mu ke mona nge ke bweta meso ya nge. Kana Yesu zola kaka kutuba mutindu mosi samu na nge mutindu Yandi ke vwandaka, kilumbu mu botikaka nge na kati ya masa, nge vwandaka bweta meso ya nge na nswalu nionso.” Yandi bwetaka meso ya yandi, mpe masa ya meso vwandaka kulumuka, mutindu *yayi*.

<sup>239</sup> Mpe mwa Mupepe kwisaka, kotaka na kati ya kivinga. Mama kwendaka na yinzo.

<sup>240</sup> Mu kwisaka na yinzo, mu basikaka na yinzo ya matanga, mu ponaka bilele. Oh, beno zaba wapi mutindu ya ke vwandaka. Beno fwana sala mutindu mosi. Bana ke na kudila, mosi awa na nsi na kisika yayi, mosi, na kisika yankaka. Mu tubaka, “Mama vwandaka dikunzi. Beto ke vwanda ata fioti ve mutindu mosi diaka ve.” Doc mpe dibuta ya yandi na nsongi *yayi*. Jesse mpe dibuta ya yandi na nsongi *yina*. Beto me zika kaka Howard, ntama mingi ve. Mu tubaka, “Mbote, beto me kwenda, bampangi.” Mu tubaka, “Beto ke. . . Beto ke monana diaka ve mosi na yankaka. Mama vwandaka kisika diziku ya beto.” Mu tubaka, “Beto ke monana diaka ve mosi na yankaka, mingi diaka ve ntangu yayi.”

<sup>241</sup> Mu kwendaka na yinzo, na kati-kati ya mpimpa, na manima ya kupona bilele ya yandi. Mu kwendaka na yinzo.

<sup>242</sup> Mama D’Amico, muntu nionso me zaba yandi, na Chicago? Yandi vwandaka nkundi ya luzolo ya kieleka ya campagne. Yandi pesaka munu Biblia. (Beno lemvokila munu.) Mpe yawu vwandaka mosi ya ba-Biblia yina ya bisono ya mbwaki na tirette na zulu ya yawu. Mpe muntu mosi, ntangu mu longaka dilongi yina, *Mwana-dimeme Mpe Yembe*, ba fidisaka munu bayembe zole, mutindu titulaire. Mpangi ya munu yankaka, Mpangi Norman, me fidisa munu yembe mosi ya fioti, mpe mwana-dimeme, Mpangi ya munu Borders pesaka munu mwana-dimeme. Mu bakaka Biblia. Meda vwandaka na nsongi mosi, ke dila.

<sup>243</sup> Mpe Bantu ya Mumbongo awa zaba, na ntangu mu vwandaka na Jamaïque, mu monaka bokilo ya munu ya kento, mu tubaka na beno kuna na mesa na Jamaïque. Mu tubaka, “Muntu mosi na kati ya bantu ya munu ke na kufwa, yina ke na meno ve. Mu me mona bawu ke kwenda.” Kaka kuna na mesa, Demos Shakarian mpe bayankaka nionso vwandaka kuna. Mwa bangunga fioti na manima, bokilo ya munu ya kento kubwaka

kaka me kufwa, na mbala mosi, beno me mona, kukondwa meno, kaka ya kieleka.

244 Mu tubaka, “Mu me mona bakala mosi ya ntwenia ke na kuluka menga.” Mu bokilaka, mu tubaka, “Beno bika Billy ve. . .”

245 Muntu mosi kele awa yina vwandaka na lukutakanu ya Jamaïque kuna na ntangu yina na—na Jamaïque, na Kingston? Mu lenda mona ve. Yinga. Ya kele na zole. Na yina kuna. . .

246 Mpe mu tubaka, “Yawu fwana. . . Billy, kumata ve kuna. Mu me mona mwana-bakala mosi ya ntwenia ke na kuluka menga.” Mpe ya vwandaka semeki ya munu ya bakala. Yandi kwendaka, vwandaka basika menga ntangu mama ya yandi kufwaka. Yawu bwisaka yandi na kati ya shoki ya mutindu yina.

247 Na yina mu telamaka awa kilumbu yina, mu bakaka Biblia yayi. Mu tubaka, “Tata, mu zaba ve. Ya lendaka vwanaka kaka zola ya Nge, Nge talisaka ve na munu kukwenda ya yandi. Kasi mu me panzana mingi, Nzambi. Nge lenda pesa munu mwa ndinga mosi ya kikesa na Ndinga ya Nge?” Mu tubaka, “Bika munu kutanga kaka kima yina ke pesa munu kikesa, pesa munu kikesa.” Mu ke bika kaka Biblia ya kuzibuka mutindu yayi. Ya vwanaka, na bisono ya nene ya mbwaki, “Yandi me kufwa ve, kasi yandi me kulala.” Mpe mu kwendaka na kati ya kivinga. Beto kwendaka lala.

248 Pene ya ngunga nana, na suka yina landaka, mu vumbukaka. Ba vwanaka kwenda kuyidika yandi, pene ya midi, na yina beto kulumukaka samu na kutala yandi. Meda basikaka samu na kubaka madia ya suka samu na bana, mpe Joe ya fioti vwanaka dila. Becky na nsongi mosi, ke dila kaka, “Mu ke mona diaka ve nkooko ya kento?”

249 Mu tubaka, “Yinga. Yinga. Nge ke mona yandi. Yandi kele kaka na simu yina, yandi me mata na étage.” Mu tubaka, “Yandi, beto ke mona yandi diaka.” Mpe yandi vwanaka zola bana yina ya fioti, beno zaba.

250 Mpe, na yina, mpe bawu nionso vwanaka dila, “Beto lenda mona nkooko ya kento na manima ya midi yayi?”

251 Mu tubaka, “Beno lenda mona nzutu yina yandi vwanaka zingila, kasi nkooko ya kento me kwenda kuvwanda na nkooko ya nge ya kento yankaka, yina kele na kuna na Mazulu.”

252 Mpe Joe lendaka ve kubakula yawu, mwa nkooko ya munu ya bakala, beno zaba. Yandi lendaka ve kaka kubakula yawu. Yandi tubaka, “Na yina nkooko ya kento ke vutuka na nkokila yayi?”

253 Mpe mu tubaka, “Ve, ve. Mu zaba ve ntangu yandi ke vutuka. Ntangu Yesu ke kwisa, yandi ke vutuka.”

254 Mpe mu vwanaka ya kutelama kuna. Mpe mu balukaka, mu kotaka na kivinga. Mpe ntangu mu kotaka. . . Beno lomba munu ve na kutendula yawu. Ya kele ve na mutindu ya kutendula yawu.

Mu me mona munu mosi ya kutelama kuna, kaka mutindu mu ke tala na nkonga ya bantu yayi. Mpe mu vwandaka twadisa bankunga. Mu me salaka yawu ata fioti ve. Mu lendaka ve kuyimba, ata fyoti ve. Na yina, mpe ya vwandaka na nkonga ya nene, ya bantu.

<sup>255</sup> Na lweka *yayi*, kivinga monanaka mutindu ya vwandaka na nganda, mutindu, oh, mu zaba ve yina beno ke bokila yawu, mutindu na kiwanda mosi, mpe mutindu amphithéâtre mosi. Mpe yawu vwandaka ntama mingi kuna, banzila vwandaka, tii kuna bawu telemisaka yawu mutindu *yayi*, na yina bayina vwandaka ntama mingi kuna na manima vwandaka tala mutindu *yayi*. Kasi mbote mingi na kati-kati. . . Kaka bandonga tatu, mutindu *yayi*. Mpe kaka kuna na kati-kati vwandaka mutindu ba-andain, ya mwa bana ya buka-buka, ya bikata ya kuvwanda na kati ya bandonga yina.

<sup>256</sup> Mpe mu lwataka kazaka ya ndombe, mpe mu vwandaka yimba, “Benoni nata bawu na kati, benoni nata bawu na kati, benoni nata bana ya fioti na Yesu.” Beto ke yimbaka yawu na yinzoni Nzambi, mwa fioti, mingi-mingi na mbiekolo ya bana. Mpe ya vwandaka, mutindu sanduku awa, kisika bantu ya lukumu vwandaka, mpe chaire vwandaka pene-pene na yawu. Kasi mu vwandaka kuna na nsi, ke na kutwadisa bankunga. Mpe na mbala mosi, mu vwandaka ya kutelama kuna, vwandaka tala na munu mosi, na manima. . . Oh, kumeka ve na kubanza yawu, samu ti benoni lenda ve. Na yina ntangu mu vwandaka *awa*, na yina ya kumaka *awa*. Mu zaba ve. Zole na kati ya bawu vwandaka kintwadi. Mpe ya kele. . .

Ya kele kima ya mbote ntangu benoni zole ke vukana.

<sup>257</sup> Mu vwandaka na camera kuna. Na kukulumukaka, mu zabaka ve wapi mutindu kukanga foto. Mu talaka na kati ya kima yango, mpe, mpangi, mu lendaka mona bima tanu to sambanu ya kuswaswana. Na yina mu bandaka na kusikimisa yawu. Billy tubaka na munu, yandi tubaka, “Sikimisa yawu, mpe yawu nionso ke kuma mosi.”

<sup>258</sup> Ya kele dibanza ya mbote na kusala yawu, benoni zaba. Benoni ke mona bima ya kuswaswana ntangu benoni ke sikimisa yawu. Mpe benoni sadila Ndinga ya Nzambi samu na kusikimisa na zulu ya Yandi, mpe benoni ke—benoni ke mona yina mu ke na kutuba. Kasi benoni tula Yawu na nsikimisa, ntete, benoni me mona.

<sup>259</sup> Na yina mu telemaka kuna, mu vwandaka tala, mpe mu kotaka na vision yina. Mpe ntangu mu vwandaka kuna, mu monaka muntu mosi ya lukumu kwisaka na manima ya kisika yango. Mpe ba vwandaka. . . Mu tubaka, “Mbote, ba ke kwisa na kivinga mosi ya lukumu.” Na yina ba vwandaka kwisa kuna mutindu *yayi*. Mpe mu banzaka, “Mbote, mu ke yimbila diaka na ntangu mama yina ke kwisa.” Yandi me lwata mutindu ya ntama.

<sup>260</sup> Ntangu yayi, bayankaka na kati ya beno bamama ke bambuka moyo na yayi, ntangu ba vwandaka lwata mutindu ya basimisi, mutindu, pene-pene *awa*, mpe ya vwandaka kulumuka kuna na zulu ya basapatu ya bansinga. Mpe yawu vwandaka mutindu ya kifuluka. . . Yinki beno ke bokilaka bima yina, mutindu—mutindu mama yayi me lwata awa ntangu yayi? Ya kele buluze. Buluze, mosi ya bima mutindu yina, mpe ya vwandaka na maboko ya kinkuti ya kieleka ya kifuluka. Beno ke bambuka moyo na yawu? Mpe yawu vwandaka mata pene-pene ya nkingu awa, na mwa bouton ya kima mosi na kati awa. Na yina, ba vwandaka lwata yimpu ya nene, ya kubalula na lweka. Mpe bamama, ya bilumbu yina, bawu vwandaka na bansuki ya yinda. Na yina bawu vwandaka kulumusa yawu mutindu *yayi*, mpe vwandaka tula yimpu na zulu ya yawu, mpe vwandaka tula épingle na kati ya yawu, beno zaba, samu na kukanga yawu na zulu, samu ba vwandaka mata na amazone mpe nionso yina.

<sup>261</sup> Na yina ntangu mama yayi vwandaka kwisa, mpe muntu nionso vwandaka zitisa mama yayi. Mpe mu banzaka, “Mbote, yandi ke kwenda na kivinga ya lukumu.”

<sup>262</sup> Na yina, kuna, mu tubaka, “Mbala mosi diaka, nionso na lweka *yayi*, ‘Beni nata bawu na kati.’ Ntangu yayi na lweka *awa*, ‘Beni nata bawu na kati.’ Na manima nionso na kati-kati, kintwadi ntangu yayi, ‘Beni nata bana ya fioti na Yesu.”

<sup>263</sup> Kaka mutindu mu tubaka yawu, mama yayi me kota yimeni na kivinga. Mu lendaka mona, ntangu yandi kotaka na kivinga, bantu nionso telemaka. Mpe bawu vwandaka sala mutindu *yayi*, samu na kuzaba yandi, mpe yandi vwanza zaba bawu.

<sup>264</sup> Mu banzaka, “Mbote, ntangu me lunga samu na munu na kulonga. Mu ke kwenda sambila samu na bambevo yina.” Mu mataka awa na—na zulu ya chaire, mutindu *yayi*, mpe kivinga vwandaka kieleka, oh, kaka pene-pene mutindu mpangi yayi ya bakala kele ya kuvwanda *awa*. Mpe mu balukaka, mutindu *yayi*.

<sup>265</sup> Mu banzaka, “Mbote, ntangu yayi, mama yina ke kulumusa yintu na ntwala ya munu, na yina mu ke zaba yandi.” Mpe na yina ntangu mu balukaka, yandi vwandaka yimeni na yintu ya yandi, me kulumusa, mutindu yayi. Mu vwandaka kulumusa yintu ya munu, mutindu *yayi*. Mpe ntangu mu telemisaka yintu ya munu, na mbala mosi, mu kutanaka na yandi, yawu vwandaka mama, ntwenia, ya kitoko mingi.

Mu talaka yandi. Mu tubaka, “Mama?”

Yandi tubaka, “Billy.”

<sup>266</sup> Mpe kaka na ntangu yina, nsemo bandaka na kusema kuna na kati ya kivinga, banzasi vwandaka nguluma, mpe kuningana mosi kwisaka. Mpe Ndinga mosi tubaka, “Kuvwanda na boma ve samu na mama ya nge.” Yandi tubaka, “Yandi ke mutindu mosi yandi vwandaka na mvula 1906.”

Mpe mu tubaka, “Yinki, na mvula 1906?”

Mpe Meda tubaka, “Yinki diambu na nge?” Kento ya munu.

Mu tubaka, “Cherie, na mvula 1906, yinki vwandaka 1906?”

Yandi tubaka, “Samu na yinki?”

Mu tubaka, “Vision mosi, mu monaka mama me telama kaka awa.”

Yandi tubaka, “Nge monaka yinki?”

Mu tubaka, “Mu monaka mama.”

Yandi tubaka, “Ya kieleka, Bill?”

<sup>267</sup> Mu tubaka, “Yinga. Yandi vwandaka ya kutelama kaka awa, mpe yandi vwandaka kitoko. Mpe Yandi tubaka. . .” Mu tubaka, “Yandi vwandaka kaka kento ya ntwenya.”

<sup>268</sup> Na yina mu kwendaka mpe mu bakaka buku ya ntama ya dibuta. Beno zaba yina yandi vwandaka na mvula 1906? Kento ya tata ya munu. Ya kele na mvula yina yandi kwelaka. Ntangu yayi yandi kele kitini ya Kento ya makwela yankaka, Kento ya makwela ya Mfumu Yesu.

<sup>269</sup> Muntu mosi na kisika mosi kuna fidisaka munu nickel mosi. Mu kele na yawu awa na posi ya munu, na mvula 1906.

<sup>270</sup> “Mpe Yandi, Mpeve-Santu, ntangu Yandi ke kwisa, Yandi ke talisa na beno bima yayi mu me tuba, mpe ke lakisa beno bima yina ke kwisa.”

<sup>271</sup> Ntangu yayi, yinki ya kele? Nzietolo ya kuzomba vwandaka kaka samu na kutunga munu, beno me mona. Mosi ya banzietolo ya kulutila kitoko yina mu me salaka ntete ve, mu zaba yawu, shoki yayi ya nene. Yina vwandaka zola. Mpe, mpangi-bakala, mpangi-kento, kana ba-vision nyonso yankaka yayi me vwanda kieleka ya kulunga, samu na yina Mpeve-Santu me lakisa, ya fwana vwanda Mpeve-Santu. Biblia ke tuba, ti, “Kana ya me salama, na yina ya vwandaka Yandi.”

<sup>272</sup> Na yina, wapi mutindu ya kivuvu beto ke kuzwa! Kilumbu mosi beto ke katuka kisika yayi. Beto ke vutuka ntwenya ya bakala mpe ya kento, samu na kufwa dyaka ve. Kulutila mbote mu zaba yina na kisika kuzaba mu zolaka zaba ti mu ke vwanda mfumu ya yinza mpe mu ke zinga ba-million ya bamvula. Mu ke zola zaba ti mu kele na diboko ya Nzambi.

<sup>273</sup> Mpe mu ke na kiese na kuzaba, na nkokila yayi, ti Yesu yina tubaka mambu yina, Yandi kele awa, na manima ya bamvula mafunda zole. Beno me mona, Yawu lenda kufwa ve. Ya kele ya Kukonda nsuka. Mpe Yandi ke kaka Yesu mosi na nkokila yayi ti Yandi vwandaka kilumbu yina Yandi tubaka mambu yayi. Mpe Yandi ke siamisa kaka Ndinga yina, kana beto ke kwikila Yawu. Beno ke kwikila yawu?

<sup>274</sup> “Ntangu Yandi, Mpeve-Santu, ke kwisa, Yandi ke tuba ve samu na Yandi mosi. Kasi Yandi ke baka bima yina, ya Munu,”

yina kele Ndinga, “mpe ke lakisa beno yawu. Mpe kuna, dyaka, Yandi ke lakisa beno bima yina ke na kwiza.”

275 Na Buku ya—ya ba-Hebreux, kapu 4, Biblia me tuba, “Ndinga ya Nzambi kele meno mingi . . .”

276 Ntangu yayi, Nani vwandaka Ndinga? Yesu. “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Ndinga kumaka muntu. Zingaka . . .”

277 “Ndinga ya Nzambi kele mbele ya meno zole, ke kota tii ke kabula, mpe tii na butomfo ya mukwa, mpe ke Swasikisa mabanza na kati ya ntima.”

278 Yina kele Nzambi ya beto. Beto kele ya kuzimbana ve, bankundi. Beto kele dyaka na lemvo ya Nzambi. Mu—mu ke zola, kutuba kima mosi, mpe kutuba samu na ntangu me luta . . . Mpe mutindu mu tubaka mazono na nkokila, mutindu bilandi yina vwandaka meka na kuzinga na zulu ya lukutakanu yina bawu kuzwaka kilumbu yina lutaka, ke tala na lukutakanu yankaka na ntuala, kasi bawu zimbanaka Mvangi ya kieleka ya mupepe mpe bitebo yina vwandaka na kati ya bwatu.

279 Nzambi yina vwandaka kuna na zulu ya myongo, na kisika yina grizzli ya bibongo ya palata landila Ndinga ya Yandi, yina me vwanda kuna na zulu ya ntoto, samu na nzikisa.

280 Ntangu yayi, kana beno zola kusonika na bakala yina, beno sonika kaka Bud Southwick, S-o-u-t-h-w-i-c-k, Bud Southwick, Fort Saint John, British Columbia, mpe beno bika yandi vutula beno mvutu. Mpe na yina, kana beno zola sala nzietolo, yina kele mwana-bakala ya mbote na kukwenda na yandi.

281 Beno tala. Yandi ke tubaka yawu na kati ya bazombi yina nionso ke lutaka na nzila yina, ti mu ke kwikila ti mu ke vwanda na lukutakanu ya kieleka ntangu mu ke kwenda kuna na ntangu ke kwisa, kaka na bantwadisi, yinga, samu na kutala bima yina ke salama kaka mutindu ya lendaka salama. Yina vwandaka na mvula me luta.

282 Yayi kele mvula yango, kaka ntangu yayi. Yesu yina mosi pesaka nsilulu, tubaka, “Mu ke bika beno ata fioti ve to Mu ke yambula beno ve. Mu ke vwanda na beno ntangu nionso, tii na nsuka ya yinza.” Beno ke kwikila yawu?

283 Na banzikisa ya mutindu yayi, na nsiamisa ya kieleka ya mutindu yayi, kieleka ya mbote, wapi mutindu beto ke zola mutindu yankaka kulutula beto ke zolaka kaka kuluta na kati ya muludi yina, kuzanguka? Beto fwana bika bima ya yinza ke yangisaka beto, mutindu yayi, na yina, beto ke mona bima ya mfunu mingi yina kele ya mbote, yina me siamisama ti ya kele kieleka?

284 Ntangu yayi, konso mbevo na kati awa, kana beno ke kwikila kaka ti Yandi yina salaka nsilulu yina, mpe na nzila ya Yandi yina katulaka épilepsie yina na mwana-bakala yina, bakala yina, Yandi kele Nzambi mosi ya kieleka kele kaka awa na ntangu yayi. Kana mu lendaka katula yawu na beno, mu ke sala yawu, kasi mu lenda ve kusala yawu. Yandi me sumbaka yawu dezia samu na beno, mpe kima mosi kaka beno fwana sala kele kukwikila yawu.

285 Yinki kana mwana-bakala yina konaka, mpe kento yina ya fioti tubaka, “Ntangu yayi, yinki simisi fwana kusala?” Yina zolaka sala diaka ve. Beno me mona? Kaka na zulu ya yandi, samu ba fidisaka yawu na yandi. Naaman dindaka na masa bambala sambwadi; kasi muntu yankaka, kana yandi dindaka, ya lendaka kaka ve kukatula wazi ya yandi. Beno me mona? Kasi beno tala. Ya kele yina Yandi ke tuba kele kieleka, kieleka yina me siamisama, kieleka ya kulunga.

286 Ntangu yayi, ntangu me luta, samu na kubokila ndonga ya bisambu. Beto—beto sukisa yawu kaka na mwa ntangu fioti.

287 Beto banza kaka. Yawu yina Nzambi silaka? Ya kele Mpeve-Santu ya kieleka yina ke sala yawu. Ya kieleka? Mbote, nani ke tuba ti Yandi vwandaka ve Mpeve-Santu? Yandi vwandaka. “Munu na Tata ya Munu kele Mosi.” Mpeve-Santu vwandaka Tata ya Yandi. “Yandi ke buta. Kima ya Santu yina me salama na kati ya yandi kele ya Mpeve-Santu.” Na yina, Mpeve-Santu mpe Nzambi kele kaka Mpeve mosi, mpe Yawu vwandaka na kati ya Yandi.

288 Mpe beno tala yina Yandi salaka na ntangu kento mosi simbaka lele ya Yandi, ntangu Yandi talaka kuna na nkonga ya bantu mpe Yandi zabaka mabanza ya bawu. Ndinga me tuba ve, ti, “Ndinga ya Nzambi kele mbele ya meno zole, yina ke Swasikisa mabanza ya ntima”? Yandi silaka ve, na Santu Jean 12, to na Santu Jean 14:12, ti, “Yandi yina ke kwikila na Munu, yandi ke sala mpe bisalu yina Mu ke sala”? To, yawu me kubwaka ve, kasi yina kele kieleka?

289 Na yina, Nzambi kele awa. Yandi kele awa samu na kubelula muntu nionso na kati awa. Yandi kele awa samu na kuvulusa moyo nionso yina me zimbana. Mpe na ntwala mu ke sala lubokilu na autel, mutindu mu me twadisama na kusala, beno me mona, samu na kusala lubokilu yayi na autel, beto bokila Yandi kaka. Bantu yikwa na kati ya beno ke yambula, to ke tuba, “Kana mu lendaka . . .” Mu banza ti banzenza awa, ke tuba, “Mu me monaka ntete ve mosi ya balukutakanu yayi. Mu—mu me kuwaka bantu kuzonzila samu na bima yayi, kasi kieleka mu—mu me monaka yawu ata fioti ve. Yawu lenda pesa munu kikesa kana mu lendaka mona Mvwandulu ya kieleka ya Klisto ke kwisa na kati ya bantu mpe kusala kima ya mutindu mosi yina Yandi salaka.” Yawu ke pesa beno kikesa?



<sup>290</sup> Beto kulumusa bayintu ya beto; samu na ndinga mosi. Meso nionso ya kukanga. Ntangu yayi bika ti Mpeve, yina ke landa Ndinga.

<sup>291</sup> Ntangu yayi, Tata, mu me sala, ya kulutila mbote yina mu zaba, Nge zaba ntima ya munu. . . Na kuzabaka ti bantu yayi ke na kumona mpasi na nsi mwini yayi, mpe yawu yina ba me fuluka kuna, ya kutelama, kasi ba me vwanda na mvibudulu. Mu ke banza ya vwandaka nkonga ya bantu ya mutindu mosi telemaka kuna na kumu kilumbu yina mpe kuwaka Nge ke tuba na bwatu. Mpe na manima Nge tubaka na bawu, “Beno losa na kati ya mudindu mpe beno kubwisa filet samu na kubenda ya mupepe.” Kukondwa kutala kana ya kele na ndambu kuna. Bawu vwandaka kuna.

<sup>292</sup> Mpe mutindu bandinga yina ya kitoko ya ntumwa yina tubaka, “Mfumu, beto me losa filet mpimpa ya muvimba mpe beto kuzwaka kima mosi ve; kasi na yina, na Ndinga ya Nge beto ke losa filet.” Mpe ntangu bawu tumamaka na Ndinga ya Nge, bawu kangaka bambisi mingi, tii kuna ba-filet bandaka na kupasuka.

<sup>293</sup> Mfumu Yesu, na ntembe ve ti bakento mingi bikaka kusukula bilele ya bawu na suka yina, babakala mingi bikaka bilanga ya bawu, kubuka bankuna, milobi me bika ba-filet ya bawu, samu na kuwa Ndinga ya Nzambi. Mfumu Yesu, kana Nge vwandaka awa na mutindu ya nzutu na nkokila yayi, ya kele ntembe mingi ti kulutila yina me vukana awa, zolaka vukana. Kasi bantu yayi ke kwikila ti Nge me kufwa ve, ti Nge me vumbuka na lufwa, mpe Nge ke talisa Ndinga ya Nge mpe ke zitisa Ndinga ya Nge, Ndinga yina mu me tanga na bawu kuna na Masonuku ya santu na nkokila yayi.

<sup>294</sup> Mpe mutindu Mfumu ya beto bakaka Biblia, to Buku, mpe Yandi tangaka, mpe Yandi vwandaka. Mpe Yandi tubaka, “Bubu yayi Disonuku yayi me salama.”

<sup>295</sup> Bika yawu salama diaka, Mfumu. Bika yawu vwanda diaka, ti na kilumbu yayi, na nkokila yayi kaka, ti Masonuku yina mu me tanga kusalama. Mpe beto me longuka, na kati ya sabala, ti yina ke vwanda kima ya kieleka yina ke talisa nsuka ya nsuka. Mpe na yina bantima ya beto ke kwenda, na kiese.

<sup>296</sup> Ya lendaka vwanda na bantu mingi awa, Mfumu, Nge ke tuba na bawu. Sadisa beto na nkokila yayi na kuzaba Ndinga ya Nge, Ndinga ya Nge me siamisa ti yawu kele Kieleka. Pesa yawu, Tata.

<sup>297</sup> Mpe mutindu beto me kulumusa bayintu ya beto, kaka samu na kuzikisa, samu na kupekisa munu na kulonga. Bantu yikwa na kati ya beno awa, yina kele ve kieleka Baklisto yina me butuka mbala zole? Ntangu yayi, beno lenda kwenda na dibuundu, kasi yina kele ve yina mu me lomba. Beno kele. . . Kana beno kele ve Muklisto yina me butuka mbala

zole, kasi beno ke kwikila ti ya kele na Yesu ke moyo, Mpeve-Santu ya kieleka, mpe beno zola ti ba bambuka beno moyo na Yandi ntangu yayi, beno zola kaka, na ntangu bayintu nionso kele ya kukulumusa ntangu yayi, mpe meso kele ya kukanga, telemisa diboko ya nge na Yandi, “Mfumu, bambuka munu”? Nzambi sakumuna nge. Nzambi sakumuna nge, nge, nge. Nzambi sakumuna nge. Nzambi sakumuna nge. Ya kele mbote mingi. Bayankaka kele?

<sup>298</sup> Ntangu yayi, beto kele ve mingi na lutangu. Kasi, beno zaba, ya kele yina ke talaka bima ya nene mpe balutangu ya nene? Mutindu beto tubaka mazono na nkokila, ya vwandaka kaka ndinga ya fioti, ya pima yina bendaka profete na kukwenda na ntwala na kizizi ya yandi ya kufika.

<sup>299</sup> Ntangu yayi, beno ke kwikila na Nzambi. Mpangi ya munu ya bakala, mpangi ya munu ya kento, vwanda na lukwikilu na Nzambi. Mpe kana Mfumu ya beto ya nene Yesu, ya lutondo ke kwisa kisika Ndinga yayi me vwanda awa, Ndinga ya Yandi Mosi, kuzibuka, mpe ke lakisa na beno ti Mpeve-Santu yayi, yina mu ke zonzila, kele Kieleka! Beno lendaka vwanda na mubulu bambala mingi na bima mingi, kasi ya ke kaka samu na kulakisa ti ya kele yina ya Kieleka kisika mosi kuna. Mpe ntangu Yandi ke sala yawu, mu zola ti beno yina me telemisa maboko ya beno, kukwisa, beno tala munu, kaka mwa ntangu fioti.

Ntangu yayi beno lenda telemisa bayintu ya beno.

<sup>300</sup> Mfumu Yesu, baka kisalu yayi na maboko ya Nge ntangu yayi. Mu kele kisadi ya Nge. Mpe malongi nionso. . . Kaka Ndinga mosi me katuka na Nge ke tuba ya kulutilla mingi kulutilla yina nionso beto lendaka tuba na luzingu ya muvimba; kaka Ndinga mosi. Pesa yawu ntangu yayi, Tata, mutindu mu ke tuma yayi, bimbangi yina. Beno zaba ti yawu kele kieleka, Tata. Nge vwandaka Yandi Yina pesaka yawu. Mpe ata mbala mosi ve ti yawu me kondwaka. Pesa yawu, na Nkumbu ya Yesu. Amen.

<sup>301</sup> Ntangu yayi, bantu yikwa na kati awa, yina kele ve na bakalati ya bisambu, bayina kele bambevo? Beno telemisa maboko ya beno, bisika nionso na kati ya kivinga, yina kele ve na bakalati ya bisambu, mpe kele bambevo. Mbote mingi. Mpe bayina kele na bakalati ya bisambu, beno telemisa maboko ya beno. Beno vwanda fioti kaka mutindu mosi. Mpe ba me vukisa yawu nionso.

<sup>302</sup> Ntangu yayi, samu na kutala kuna na nkonga ya bantu, ntete, samu na kuvwanda ya kusungama na ntwala ya Nzambi mpe na ntwala. . . beno. Mu zaba yawu, mu ke tala *awa*, ti bankundi ya munu yankaka kele ya kuvwanda na nsongi *yayi* awa. Mpangi Noel, ya yandi—ya yandi. . . mpe Mpangi-kento Jones, mpe Mpangi Outlaw, mwana ya munu ya bakala, bampangi yayi *awa*, mpe Mpangi Moore. Mu zaba ve mpangi-bakala *yayi*, kasi mu me monaka yandi na balukutakanu, na bantangu fioti me

luta. Mu lenda ve kutanguna nkumbu ya mpangi-bakala *yayi*, to, kasi mu zaba yandi kaka na kizizi. Mpangi-kento *awa*, Mpangi-kento Williams. Mpangi-kento Sharrit kuna na nsongi. Kuna na manima ya kele na mwa bantu ya tabernacle na Jeffersonville.

<sup>303</sup> Ya kuvwanda awa kaka kele nkundi ya munu ya luzolo, ya bamvula makumi yivwa, yina me katuka na Ohio, ke nataka ditoma na yinsi ya muvimba. Mpe mu ke na kukwenda na Afrique, mpe yandi mpe kento ya yandi ya luzolo me lomba kana bawu lendaka kwenda na Afrique na munu. Yandi tubaka, “Beto ke futa . . .” Bamvula makumi yivwa, mpangi mosi ya Allemagne, yina me zabaka ata fioti ve Mfumu. Ntangu mu longaka na nkokila mosi, yandi kwisaka na bilele ya yandi ya mbote, samu na kubaka mbotika. Bamvula makumi yivwa! Na nganda ya . . .

<sup>304</sup> Mu ke kwikila, oh, yayi kele Mpangi Waldrop mpe Mpangi-kento Waldrop kele ya kuvwanda *kuna*. Ntangu yayi, ya kele kaka ntama . . . mpe Mpangi Borders. Ntangu yayi, ya kele pene na yawu.

<sup>305</sup> Ntangu yayi, mu ke na kubokila bankumbu ya bawu. Ntangu yayi, kana beno yina zaba munu mutindu yina, beno sambila ve. Beno me mona? Beno sambila samu na munu. Beno me mona?

<sup>306</sup> Kasi mu zola ti beno yina me zaba munu ve, mpe beno zaba ti mu me zaba beno ve, mu zola ti beno tuba na kati ya ntima ya beno, “Mfumu Yesu, mu me kuwa yayi ba me zonzila. Mu—mu me kuwa longi yayi na nkokila yayi ke tanga yayi kuna na Biblia. Mu kuwaka kimbangi yina, mpe mu me kuwa mutindu mosi, beno zaba, na bantangu ya kuswaswana yayi me salama. Beto me kuma pene-pene na nsuka, Mfumu? Beto me kuma pene-pene?”

<sup>307</sup> Beno bambuka moyo, ntangu kidimbu yina salamaka na Sodome, mbanza yina yokamaka na tiya, Yesu talisaka na yawu, Yandi tubaka, “Mutindu ya vwandaka . . .” Ya vwandaka kidimbu ya nsuka yina bawu kuzwaka na ntwala kubeba ya mbanza. Mpe Yesu tubaka ti yina ke salama dyaka na nkwizulu ya Mwana ya muntu.

<sup>308</sup> Ntangu yayi, beno zaba ti ya kele kieleka, wapi mutindu ti . . . Nzambi, Nzambi na kati ya nzutu! Bantu yikwa ke kwikila ti ya vwandaka Nzambi yina solulaka na Abraham? Yinga. Mbote, Biblia ke tubaka, “Elohim,” na yina, -ya—ya kele Mvangi ya nene ya mazulu mpe ntoto, Yandi yina kele nionso ya kulunga. Yandi vwandaka.

<sup>309</sup> Yinki Yandi vwandaka talisa? Yandi vwandaka na kati ya nzutu ya muntu, telemaka kuna mpe kudiaka nsuni ya mwana ya ngombe, mpe kunwaka miliki ya ngombe, mpe na yina lendaka zimbana na ntwala ya meso. “Mu ke kwisa tala nge landila ntangu yina Mu silaka nge.” Beno me mona? Yandi bokilaka yandi na nkumbu ya yandi. Mpe na mukongo ya Yandi ya kubaluka, tubaka, “Wapi kisika Sarah kele?”

Yandi tubaka, “Yandi kele na kati ya tenta na manima ya Nge.”

Yandi tubaka, “Mu ke kwisa tala nge landila ntangu ya luzingu.”

<sup>310</sup> Mpe Sarah tubaka, “Hmm, hmm,” na manima ya tenta.

<sup>311</sup> Yandi tubaka, “Samu na yinki Sarah me seka?” Beno bambuka moyo, Biblia ke tuba ti yandi vwandaka na kati ya tenta na manima ya Yandi. Yandi tubaka, “Samu na yinki Sarah me seka?”

Sarah tubaka, “Mu me seka ve.”

Yandi tubaka, “Yinga, nge me seka.” Beno me mona? Ya kieleka.

<sup>312</sup> Muntu mosi me telama kuna, Nzambi ke kukitalisa Yandi mosi na nzutu ya muntu. Yesu tubaka ti ya ke vwanda kima mosi na nkwezulu ya Mwana ya muntu: Nzambi na kati ya Dibuundu ya Yandi, beno, munu, ke kukitalisa Yandi mosi. Ntangu yayi, ya vwandaka na kento mosi ya fioti. . .

<sup>313</sup> Ntangu Nzambi vwandaka na kati ya Klisto, Yandi vwandaka na Mpeve ya kufuluka. Yandi vwandaka Nzambi. Mu kele kaka mosi ya bisadi ya Yandi, mpe beno kele kaka mosi ya bisadi ya Yandi. Beto kele na Mpeve na—na kitezo. Yandi vwandaka na Yawu kukondwa kitezo. “Na kati ya Yandi zingaka kufuluka ya Bunzambi na kati ya nzutu.” Na kati ya munu kele kaka mwa dikabu, mpe na kati ya beno kele dikabu, ya Yandi. Kasi, wapi mutindu ya kele ya fioti, ya kele kaka Mpeve mosi.

<sup>314</sup> Ntangu yayi, kana yina kele Mpeve ya Nzambi, Yawu ke sala bisalu ya Nzambi. Ntangu yayi, beno sambila mpe beno tuba, “Mfumu Yesu, kento mosi ya fioti kilumbu mosi simbaka lele na Yandi.” Mpe beto ke tuba. . .

<sup>315</sup> Awa na Ngwisani ya Malu-malu, yandi tubaka na ba-Hebreux, yandi tubaka, “Yandi kele Nganga-Nzambi ya Mbuta kaka na ntangu yayi, yina lenda simbama na nsatu ya bimbevo ya beto.” Bantu yikwa zaba ti ya kele Biblia? Beno tuba, “Amen.” [Dibuundu me tuba, “Amen.”—Mu.] Kieleka. Mbote, yina fwana vwanda kieleka.

<sup>316</sup> Mbote, kana Yandi kele mutindu mosi mazono, bubu yayi, mpe kukonda nsuka, wapi mutindu Yandi ke pesa beno mvutu? Mutindu mosi Yandi salaka mazono, kana Yandi kele mutindu mosi bubu yayi.

<sup>317</sup> Ntangu yayi, beno sambila mpe beno tuba, “Mfumu Yesu, bika mu simba lele ya Nge. Na yina, Nge me pesa Mpangi Branham mwa dikabu, samu na kupesa beto kikesa. Mpe yandi zaba munu ve. (Mu kele ya kuvwanda na manima *awa*; mpe na lweka *awa*; mpe na nsi *awa*; mpe kisika nyonso mu kele. . .) Yandi zaba munu ve, kasi Nge zaba munu. Mpe bika mu mona Mpeve ya Nge ya nene, Mfumu. Ya kele ve mutindu mu fwana

sala yawu, kasi samu na kusadisa munu mpe bayankaka, samu ti beto me tanga Ndinga. Bika mu simba lele ya Nge, na yina Nge ke vutula mvutu. Bika ba sadila munu na nkokila yayi, Mfumu, samu na lukanu yina. Ya ke lakisa bantu nyonso ti Nge kele dyaka moyo.” Ya ke vwanda mbote kana Yandi ke sala yawu?

<sup>318</sup> Ntangu yayi, beno sambila kaka, beno mosi, na malembe. Beno tuba, “Mfumu, bika mu simba lele ya Nge.” Mpe mu ke kukipesa munu mosi na Mpeve, mpe na yina bika ti Mpeve-Santu kusala yina me bikana. Samu, ntangu yayi, mu me tuba, mu me pesa kimbangi, kasi mu lendaka ve kusala dyaka ntangu yayi. Mu kele na nsuka ya nzila.

<sup>319</sup> Mu ke tala kaka nkonga ya bantu, samu na kutala kana mu. . . Mu fwana mona yawu, beno zaba. Beno me bakula yawu.

<sup>320</sup> Kuna na manima na diboko ya munu ya kikento, kuna na manima, pene ya kati-kati ya nzila na manima ya kivinga, kele kento mosi ke sambila. Yandi ke zola kufwa, kana Nzambi kusadisa yandi ve. Yandi kele na cancer, mpe cancer kele na zulu ya dibeke ya yandi. Oh, bika ti yandi kukondwa yawu ve!

Sadisa munu, O Mfumu.

Mpangi-kento, kana nge lenda kwikila! Oh, la la! Yandi ke kondwa yawu.

Mfumu Yesu, sadisa beto, beto ke sambila.

<sup>321</sup> Marie May. Nge yandi yina. Beto kele banzenza mosi na yankaka? Mu zaba nge ve. Nge zaba munu ve. Mambu yina, mpe yina. . . nionso ba me tuba kele kieleka? Na yina, kwikila. Ya ke suka. Amen.

<sup>322</sup> Ntangu yayi, kubanda mudidi yina vwandaka na zulu ya yandi, yawu ke nsemo. Ya kieleka kaka mutindu mwana-bakala yina, epilepsie kwendaka ntama na yandi. Nzambi mosi yina, Yandi yina vwandaka na zulu kuna na bamfinda ya nord, kele Nzambi mosi awa. Beno kwikila kaka. Amen. “Kana nge lenda kwikila!”

<sup>323</sup> Yawu yayi na zulu ya kento mosi yina me vwanda awa na ntwala ya munu. Yandi kele na kima ke tambula mbote ve na mukongo ya yandi. Ya kele disque me basika kuna, na mukongo ya yandi. Yandi—yandi ke vwandaka awa ve. Yandi me katuka na Montana. Nkumbu ya yandi kele Mademoiselle Stubbs. Telama, baka kubeluka ya nge na Nkumbu ya Yesu Klisto.

Beno fwana ve kuniema kima mosi. Vwanda na kimpwanza.

<sup>324</sup> Bakala mosi ya nene me vwanda awa, ke tala munu, ke sala mutindu yayi. Kwikila. Nge ke beluka. Nge ke na mpasi ya kudasuka. Kana nge kwikila yawu, Nzambi ke belula nge.

<sup>325</sup> Mama yina kele na kimbevo ya bakento. Kwikila yawu, mpe nge lendaka beluka. Vutuka na yinzo, mpe vwanda na lukwikilu na Nzambi. Samu na yinki mu me tuba vutuka na yinzo? Nge

fwana vutuka na New Mexico, samu na kukuma kuna, Tata mpe Mama Watkins. Ntangu yayi, beno zaba ti mu zaba beno ve. Amen.

<sup>326</sup> Mama yina kele kuna na manima, na mputa yina na dikulu, Mademoiselle Brown. Nge ke kwikila ti Nzambi ke belusa nge? Nge ke monana na kiese mingi. Ntangu yayi, nge zaba ti mu me monaka nge ata fioti ve na luzingu ya munu. Na dikulu ya kikento. Ntangu yayi, kwikila na ntima ya nge ya muvimba, nge ke beluka.

<sup>327</sup> Mama yina ke meka na kutambula, mpe yandi kele na arthritis. Yawu me kanga yandi, yimbi. Mama Fairhead, nge ke kwikila na ntima ya nge ya muvimba, mpe nge ke beluka. Ntangu yayi, nge zaba ti mu me monaka nge ata fioti ve na luzingu ya munu. Ti, oh. . . [Mpangi-kento me tuba, “. . .belukaka na ntuala. Mu me belukaka na ntuala, mpe mu zaba ti Yawu ke belusa munu.”—Mu.] Amen. Yinga.

<sup>328</sup> Nge ke kwikila na ntima ya nge ya muvimba ntangu yayi? Ntangu yayi, yinki Yandi ke sala? “Yandi ke baka bima yina mu me tuba na beno, mpe ke lakisa yawu na beno. Mpe na yina Yandi ke talisa beno bima yina ke kwisa.” Beno me mona yina mu zola tuba? Beno ke kwikila na Yandi?

Ntangu yayi beto kulumusa bayintu ya beto.

<sup>329</sup> Ntangu yayi, beno zaba ti kana beno zolaka kufwa na nkokila yayi, ti beno ke vwanda. . . zolaka vwanda ve. . . beno zolaka kwenda, beno me butukaka ve mbala ya zole. “Kana muntu me butuka ve mbala zole, yandi lendaka ve kumona Kimfumu.” Samu na yinki beno me kwisa ve *awa*? Beno telega awa mpe beto ke sambila samu na beno, kaka awa, na mwa ntangu fioti. Beno ke kwisa kaka na ntangu yayi na Mvwandulu ya Mpeve yayi?

<sup>330</sup> Beno ke mona ata fioti ve kima yina ke salama ya kulutila nene tii kuna beno ke mona Nkwizulu ya Mfumu. Ntangu yayi, beno bambuka kaka moyo. Ya kieleka mu zaba yina mu ke na kutuba, to Yandi zolaka ve kupesa ministere. Beno bika ve yawu kuluta beno ntangu yayi. Beno kele ya kusungama?

<sup>331</sup> Beno zola kwisa? Kana ve, kuna, kati-kati ya beno mpe Nzambi, yawu kele. Mu me zaba diambu ve. Mu kele ya kutsyema na menga nyonso, samu ti mu me tuba na beno Kieleka. Mu me longa beno Ndinga. Mu me tuba na beno yina Yandi vwandaka. Mpe Yandi, ntangu Yandi kwisaka, Yandi siamisaka yina Yandi vwandaka na ntangu yina; mpe Yandi ke bika munu kutalisa yina Yandi kele na ntangu yayi. Yandi kele mutindu mosi Yandi vwandaka kuna. Beno ke kwikila yawu?

<sup>332</sup> Na yina, bambevo yikwa kele awa, muntu yankaka kele mbevo awa? Beno telemisa maboko ya beno.

333 Ntangu yayi beno tula maboko ya beno na zulu ya mosi na yankaka, mpe beto ke sambila kisambu ya lukwikilu samu na beno.

334 Ntangu yayi mu zola kuyufula beno kima mosi, na malembe. Kana Nzambi, kana Nzambi lenda kwiza mpe kusala kimangu yina! Kimangu kele kima yina ba lenda tendula ve. Ntangu yayi, kana beno ke zola kuyufula muntu mosi na kati ya bantu yayi awa, beno yufula bawu, na konso ntangu yina bisika nionso. Beno me mona? Beno bambuka kaka moyo, ya kele Nzambi. Yayi awa kele kaka ba-vision ya fioti. Nani—nani, yinki ke salaka yawu? Ya kele beno, beno mosi. Beno kele bayina ke salaka yawu.

335 Beno me mona, ntangu kento yina simbaka lele ya Yandi, Yandi tubaka, “Ngolo me basika na Munu.” Kasi ntangu Tata talisaka Yandi samu na Lazare, mpe Yandi kwendaka ntama kuna mpe vutukaka, mpe vumbulaka Lazare na lufwa, Yandi tubaka ata fioti ve “ngolo.” Yina vwandaka Nzambi ke sadila dikabu ya Yandi Mosi, mpe yina yankaka vwandaka kento yina vwandaka sadila dikabu ya Nzambi.

336 Mu kele ve dikabu ya Nzambi. Yesu Klisto kele Dikabu ya Nzambi. Ya kele kaka dikabu yina Yandi pesaka munu, ti mu butukaka mutindu yayi, na subconsciousience mpe conscience (ntete conscience) kaka kintwadi. Beno fwana kwenda kulala ve; beno ke mona yawu kaka. Mpeve-Santu ke kwisa na zulu ya subconsciousience kaka mutindu Yawu ke salaka na zulu ya conscience ya ntete. Kana Yawu kwisa na zulu ya subconsciousience ya beno, beno ke kuzwa ndosi ya kimpeve. Kana Yawu ke kwisa na zulu ya munu, mu ke lota ndosi ve. Mu ke tala kaka kuna mpe mu ke mona yawu. Beno me mona? Mpe, beto me butukaka, beno lenda ve kukuma beno mosi kima yankaka. Beno me butukaka mutindu yina. Beno me mona? “Makabu mpe balubokilu ba ke sobaka yawu ve.” Yinki ya ke sala? Samu na kutalisa Yesu Klisto. Yandi kele mutindu mosi mazono, bubu yayi, mpe kukonda nsuka.

337 Na maboko ya beno me tentika na zulu ya mosi na yankaka, mu ke tula kivuvu ti beno ke tula ntima ya beno na lukengolo ya Nzambi na ntangu yayi, “Mfumumu, tala munu. Mu me lemba mingi na bima ya yinza, ti mu ke kondwa kumona ngunga yayi ya nene ke na kuluta?”

338 Beno zaba, ya ke vwandaka ntangu nionso mutindu yina. Yawu me luta kaka na kati ya dibuundu, mpe ba me zaba yawu ata fioti ve. Ya kele disolo. Beno bika ve yawu kuluta, bankundi, kumona ndinga mosi me talisama, diaka mpe diaka, kumona Ndinga ya Nzambi me monisama, mpe Muntu ya kieleka ya Yesu Klisto ke kwisa kaka na kati-kati ya bantu yayi mpe ke sala kieleka mutindu Yandi salaka ntete.

<sup>339</sup> Tata ya Mazulu, mu me zaba ntangu yayi, Mfumu, ti Ndinga ya Nge me tangama. Kimbangi me pesama. Mpeve-Santu kulumukaka mpe siamisaka Ndinga yina mpe kimbangi yango. Ntangu yayi yawu kele na maboko ya bantu, Mfumu. Yawu kele na makulu ya bawu. Kima yankaka ve mu zaba na kutuba. Mpe mu zaba ve kima yankaka yina Nge sonikaka na kati ya Ndinga, ti Nge ke sala, samu ti Nge me belusaka bawu yimeni. Ya ke sala kaka ti bawu kwikila yawu. Mpe Nge ke sala kima mutindu yayi, mpe wapi mutindu beto lenda tula diaka ntembe? Wapi mutindu beto lendaka pesa muswa na Satana na kukanga conscience ya beto diaka?

<sup>340</sup> Satana, mu ke samuna kubeluka yayi na zulu ya bantu yayi, mpe mu ke tuba na nge, “Mu ke tuma nge, na Nkumbu ya Mfumu Yesu Klisto, basika awa. Basika, na Nkumbu ya Yesu Klisto, mpe bika bantu yayi kukwenda.”

<sup>341</sup> Ntangu yayi, kana beno ke kwikila na Yandi, beno telema. Beno ke kwikila? Beno telema, mpe beno pesa nkembo na Nzambi. Beno telema mpe beno kwikila yawu. Beno tula ntembe na yawu diaka ve.

<sup>342</sup> Na Nkumbu ya Yesu Klisto, bika ti Mpeve-Santu kunata kiese, ngolo, mvumbukulu, Luzingu na bantu yayi, Mfumu.

<sup>343</sup> Beno pesa Yandi lukumu ntangu yayi, mpe beno sakumuna Nkumbu ya Yandi ya santu. Beto zola Yandi. Beto ke kumisa Yandi. Beto ke kembila Yandi, Yandi yina ba lendaka fwanikisa ve, Yandi yina kele ya Kukonda nsuka, Mwana ya Nzambi ya moyo. Na Nkumbu ya Yandi, kuzwa Yandi. Yandi kele awa. Amen.





*MPEVE YA KIELEKA* KNG63-0118  
(Spirit Of Truth)

Nsangu yayi ya Mpangi William Marrion Branham, kulongamaka na Kingelesi, na Kilumbu ya tanu na nokila, na kilumbu ya 18 ya Ngonda ya ntete, na mvula 1963, na Dibuundu Ya Bayinsi Nionso na Phoenix, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)